

**IIRAI RUILLAI DO IITIFUIAI JINO
 CIOTAINA
 Juziñamui San Juaamo Jino
 Cíotagafue
 EL APOCALIPSIS
 O Revelación a San Juan**

Jesucristo jino onóitagafue

¹ Bifue uire íitifuiaí jino cíotainafue. Juziñamui bífuiaína Jesucristomo cíotate, afémie ie ocuífireganomo ácatallena. Daií Cristo uáfue na raire ífícaítífue na jino íaioimo ácatate. Jesucristo ie ángel daína abi ímiedo bie jino cíotagana ie ocuífiregamie Juaamo onótate. ² Afe Juan nana ie ciónana uáfue na jino llote. Daje izói afémie Juziñamui lloga uaina nabáífirede. Afe Juziñamui lloga uai Jesucristodo ñue jaícina llócaiga. ³ Bie Juziñamuimona oga uaina jíáímacimo facáduana cacáđino caimare itíaioí. Daje izói bie rabénicomo cuega uaina cacáillano ñue náfuetino caimare íóbitiaioí. Mei bie rabénicomo llogáfuaí zúitirui ja áinozideza.

Siete dígade iglésiaí daína Juziñamuimo gáirífiređinomo Juan cuete

⁴ Asia éniemo ite siete dígade iglésiaí daína Juziñamuimo gáirífiređinomo cueticue. Cue Juáadicue. Mai Juziñamui ñúefuiaí dibénemo, naa ie caimare uái illafue dibénemo omoí iri. Mei afe

Juzíñamui birui itímieza, íemo jaca nanómona jaiiai itímieza, íemo uire jaca ninomo íitimieza. Daje izói ie ráirano uícomo siete dígade ñuera jóriai ite. Afe jóriai Juzíñamui Ñuera Joreño jana. Afémie ñúefue dibénemo omoi iri. ⁵ Iemo daje izói Jesucristo lloga ñúefuiai jeire omoi oíri. Afémie jíáifo méidofínide uai nabáiraima. Daje izói afémie nano tíllanomona abido meine tíñellena cáatagamie. Iemo jíái afémiemo bínie illáicomini ocuilla ríino ite. Afe Cristo caina izíruillano ie totaca díedo cai fiénidifuiaina oni dote. ⁶ Iemo nane illáicomina caina itátate ie Moo Juzíñamuimo cai jaináillena. Daje izói comínido Juzíñamuimo úrifiredinona caina jóonete. Afe Juzíñamui íena jóonegacai. Ie jira jaca ninomo áillue ébifue naa ocuilla ríino díga afémie íena íteza. Aquíe izóideza.

⁷ ¡Ero, Cristo mona uílliedo bite! Nana comini íena cíoitiaíoi. Daje izói ie fatino íena cíoitiaíoi. Iemo nana bínie nairai afémie bíllana cíoillano éenaitiaíoi. Jíi, uafue daítadeza.

⁸ Cai jamánomo ríire Ocuídímie bie izói daide: “Nana ráfuiiai nai cómuiñenia uícodo itímiedícue. Daje izói fuizájillanomo itímiedícue. Abecedario A-do táinia izói nánoramiedícue. Daje izói abecedario Z-mo fuizailla izói íiraimiedícue,” daide. Afémie birui itímie, íemo jaca nanómona itímie, íemo uire jaca ninomo íitimieza.

Ebírede Cristo nicáirilla izói ciona

⁹ Omoi ama Juáadícue. Omoi duere zefuilla izói daane duere zefuídícue. Daa omoi izói Juzíñamui illáimana illánomo jaináidícue. Iemo

Jesucristo omoi úiñotaja izói daa omoi ðiga úiñotagacue. Jesucristodo fairíotaga Juziñamui ñuera uai jino cue llócailla jira llavécacue. Pátmosmo mámecirede monaillai cigi ídumo llavécamiedicue. ¹⁰ Iemo afénomo cai Ocuíraima cai ocózinaitaruimo Juziñamui Ñuera Joreño náamatagacue. Afe llezica vudugoi fúunua izoide ficírede uaina cue méifomo cacádicue. ¹¹ Afe uai cuena daide:

—Naga ráfuiái uícodo itímiedicue. Daje izói fuizájillanomo itímiedicue. Abecedario A-do taineca, íemo Z-mo fuilla izóidimiedicue. Mai nana o ciona ðiga daa rabénicomo cúeiri. Cuiano, Asia éniemo ite siete ðigade iglésiai daina Juziñamuimo gairífiredinomo o oreri. Afe jófueniai mámeciai: Efeso, íemo Esmirna, íemo Pérgamo, íemo Tiatira, íemo Sardis, íemo Filadelfia, íemo Laodicea, — daide.

¹² Bu cuemo úrilla daiíllena abido gírecaidicue. Gírecaillano, siete ðigade oro finoina mechérana ciódicue. ¹³ Afe cígimo cómemona comuídimiena eróidena ciódicue. Afémie jitáoigaroi éiba ícoimo dúcide. Ie jogóbemo lláiidife oro finoina. ¹⁴ Afémie ifótirai iere úzerede, jaiilici úzerena izói úzerede. Iemo jiái nieve izói úzerede. Ie ui irai bóua izói cíoide. ¹⁵ Afémie éiba ñue queníretaga bronce izói quenírede. Ua bronce iraimo ruílla llezica jamánomo quenírena izói, ie idaí quenírede. Iemo aillo imánillai nofico tua ficírena izói ie uai ficírede. ¹⁶ Afémie onoi nabézimo siete ðiga ucudu llíide. Ie fuémoma iere jáirede llojéfai izoide raa jino billa; afefai nágafene jáirede. Ie uiéco jitoma iere riire egáiñua izói riire egáiñote.

17 Afémiena cíollano, ie anamo tídimie izói baídicue. Mei íadi afémie ie nabezi cuemo bíitano cuena daide:

—Jacíruiñeno o iri. Cue bie nanóidimiedicue; dáamiedicue fuizájillanomo íitimiedicue. 18 Birui cáadimiedicue. Mei nauí tídicue, mei íadi birui jaca ninomo cáaiticue. Tílla zuitara llave izoide raa cuemo ite; daje izói tídino illano lláveniai cuemo ite. 19 O ciona díga mai cúeiri; birui itífuiai cúeiri, íemo uire cómuitífuiai cúeiri. 20 Cue nabézimo o ciona siete dígade ucúduai rafue nauí báinino ite. Ja birui jino uáfodo llórede; daje izói siete dígade mechera rafue llórede. Afe siete dígade ucúduai siete dígazie Juzíñamuimo gairídino uai llócaítino jana. Iemo afe siete dígade mechera siete dígazie Juzíñamuimo gairífredino jana, —daí afémie cuena daide.

2

Siete dígade iglésiai daina Juzíñamuimo gairífredinomo lollíuai: Efésomo ite ínotinomo llogáuai

¹ Cue cíonamie dáanomo cuena daide:

Efésomo ite Juzíñamuimo gairídino úíñoraimamo bíuai cúeiri: “Afe nabézido siete dígade ucúduai llíidimie daje izói siete dígade oro finoina mechera cígido macáfiredo. (Afémie mechera cígido mácafírena izói, comini ñue úíñolle jana.) Afémie afe úíñoraimana bie izói daide:

² Nana o finócafuiaina onódicue. O ríredemo táijidíozá onódicue, naa o começi járitaiñedeza.

Daje izói fiénidino fiени illáfuiaina iere izire o rairuillana onódicue. Iemo jiái táinona “Jesucristo orécanodicaí” daidínona facátatioza onódicue. Afemona afémaci taino llúana baitioza. ³ Jaca o comeci járidoñedio, íemo iere cuedo o táijina llezica cue ícoinia iere duere zefuídioza. Afe llezica zefuiruiñeno ñue táijidio. ⁴ Mei íadi daa figóñedifuenta omo ite. Nano fueñe cue o izíruilla izói birui cuena izíruiñedio. ⁵ Ie jira ninómona oni nibéfodo baiídioza comeci uibi. Mai omo itifue méidori. Fueñe o illa izói o iri. Bífuenta o méidoñenia omo raire bíiticue, omo ite egáñote raa oni óllena. ⁶ Mei jiáifodo, daa ñúfuenta nai omo ite. Afe nicolaítas fiени finócafuiaimo naa íaioi fiени jiáifodo llógamo éoicana eróidio. Cue daje izói áfena éoídicue. ⁷ Ñuera Joreño Juzíñamuimo jaináidinona dáinamo cacáacadimie áfemo cacai. Afe Ñuera Joreño bie izói daiácade: “Fiénidena anáfenodinona jáidimacina Juzíñamui nífueninanomo ite cáatate amena llizíllana güitátaiticue,” daide.

Esmírnamo ite ñnotinomo llogáuai

⁸ Daje izói Esmírnamo ite Juzíñamuimo gairídino úiñoraímamo bíuai cúeiri: “Nanódimie dáamie íiraimiena ómoimo úrite. Naui bíniemo tídimie, íemo meine abido nane cáadimiena jaide. Afémie ona daide: ⁹ Nana o finócana onódicue. Daje izói o duere zefuillana onódicue, naa o ráanina diga. Mei íadi uáfueza Cristo dibénedo iere ráaredio. Jiáimaci fiени omo úrillana onódicue. Afémaci, “Juzíñamui nizeca Judíodicaí” daidíaioi, mei íadi íeñediaioi. Afémaci dani Taife dibénemo jaináidino. ¹⁰ Duere o zefuillemo jacínaiñeno o iri. Mei ómoimona

dámierie Taife llavéracomo llavétaiteza, nana omoi facátallena. Daií omoi comeci ifue onóillena facátalliomoi. Diez dígarui duere zefuírediomoi. Mei íadi o tíllinomo zóofeñeno ñnofireiri. Daií o íadi zíiñona cáallena o jirídotaiticue. ¹¹ Ñuera Joreño Juzíñamuimo jaináidinona dáinamo cacáacadimie mai áfemo cacai. Afe Ñuera Joreño bie izói daiíacade: “Fiénidena anáfenodinona jáidimaci nane méifodo tíllamo raamo jiríñeitiaoí,” daide.

Pérgamomo ite ñnotinomo llogáuai

¹² Daje izói Pérgamomo ite Juzíñamuimo jaináidino úiñoraimamo bíuai cúeiri: “Afe nágafene jáirede lloefai llíidimie bie izói ona daide: ¹³ Nana o finócana onódicue. Afe izói Taife ocuícano cígimo itioza onódicue. Afénomo itio íadi zóofeñeno cuemo ñue o ñnuana onódicue. Daje izói cuemo o ñnuana fáicanocaiñedio. Afe izói Antipas mámeciredimie cue ñue jaícina cue uai nabáifiredimie. Afémie omoi cígiri fatíaoí. Ie fáinaruido, cuemo omoi ñnuana zóofeñediomoi, Taife illánomo itíomoi íadi. ¹⁴ Mei íadi cue lletárafuiana ómoimo ite. Omoimona dáarie jadí Pérgamomo Balaam llófuiana fáicanocaiacañediaoí. Afe Balaam jaii Balacna llófujete Israel comini fieni finuaillena. Afe Balac Balaam llófuiamona Israel cominina jánaraimo fecaca rílleniaina ritátate. Afe dáaruído afémacina iere jiruítate. ¹⁵ Nane jáie cue lletárafuena ómoimo ite. Omoi cígimo dáarie afe nicolaítas lloga uaina féitaiacañedino ite. Afémacina éoidicue. ¹⁶ Ie jira mai omoi comeci ifue méidori; mei íadi omoi méidoñenia, raire omoi

diga fuirízaibitícue. Uáfueza cue fuémona bite jáirede lloéfaido omoi fieni finódinona fáziaibitícue. ¹⁷ Ñuera Joreño Juzíñamuimo jaináidinona dáinamo cacáacadimie, áfemo cacai. Afe Ñuera Joreño bie izói daiíacade, “Fiénidena anáfenodimiena jáitimie afe báinino ite maná daina monámona cocide güillena güitátaitícue. (Bie maná Juzíñamui íaioi comécina náiretaillena jana.) Iemo afémiemo úzerede nofitofena fécaítícue. Afe nofitofemo buna ónoñega comue mámecei cuelle. Dama afe nofitofe llíinoitimie áfena onuille.” Aquíe izói daide.

Tiatíramo ite ínotinomo llogáuai

¹⁸ Daje izói Tiatíramo ite Juzíñamuimo jaináidino úiñoraimamo bíuai cúeiri. “Juzíñamui Jitó ómoimo úrite. Afémie ui irai bóua izoide, íemo ie éiba ñue queníretaga bronce izói quenírede. Afémie bie izói ómoína daide. ¹⁹ Nana omoi finócana onódícue. Cuena omoi izíruillana onódícue, naa cuemo omoi ínua diga. Daje izói cue dibénedo ñue omoi táijicaillana onódícue, naa omoi comecei járitaiñena diga. Fueñe omoi táinia baímo birui jamánomo finóicaídiomoi. ²⁰ Mei íadi ómoimo daa cue lletárafuena nai ite. Afe Jezabel mámeceiredingo llógana rairuíñediomoi. Afengo, “Juzíñamui dibénedo úritícue,” daiífirede, mei íadi fieni ie llócaigafuedo cue ocuífireganona jífujete. Afe jífuia uaido íaioína iere jiruítetade. Daje izói jánaraimo fecaca rílleniaina íaioína ritátate áfemo caimátaillena. ²¹ Aféngomo are úiñoidícue afengo comecei ífue méidollena. Mei íadi afengo áfena méidoacañede. Afengo ie jiruífueña fáicanocaiacañede. ²² Mei jira birui afémaci

afengo finócafuenta fáicanocaiñenia, aféngona iere izire iráretaiticue. Daje llezica nana afengo diga jiruiredinona duere zefuítaiticue. ²³ Afengo úruiaina títaiticue. (Afe úruiai daina afengo llógamo jíeruitino.) Afemona naga come ifoci úrillana, ie comeci ifue diga ñue ícoimo cue onónana, nana Juzíñamuimo gairídino fidiitiaoí. Iemo ómoimona illa dígamie fiene omoí finuaze ómoína duere fínoiticue. ²⁴ Mei íadi ómoimona Tiatíramo ite jíaimaci afe Jezabel omoí llófuia fiénide uaina náfuenediomoí. Afe Jezabélmo jaináidino íaoí llófueinana daidíaoí, “Cai llófueina uai Taife ie, iere báinide nai uáfodo ónonidífuiai,” daidíaoí. Afe llófueinana onotáñegaomoí. Iemo ómoimo ite nauí cue lloga baimo jíaiena ómoína ócuíñeiticue. ²⁵ Daa bie llóiticue: Omoimo ite ñúefuiai ñue rairuiri, nai cue bíñeille dino. ²⁶ Fiénidena anáfenodinona jáitina náraiaí ócuitimacina jóoneiticue. Afémaci cue jítainana ñue ícoimo fuitádino. Ocuille ríino íaoimo jóoneiticue, ²⁷ mei daí cue Moo cue ocuille ríinona cuemo jóneteza. Iemona náraiaína rírede lloébici izóidedo ríire ócuítiaoí. Iaoimo cacáreacañedinona icírui lláia jéenino llairúngotaila izóí, afe izóí íaoína duere fínoítiaoí. ²⁸ Daje izóí monáiracudu iere ebire egáñua izóí, afémacina ebire fínoiticue. ²⁹ Ñuera Joreño Juzíñamuimo jaináidinona dáinamo cacáacadimie mai áfemo cacai.” Aquíe izóí daide.

3

Sárdismo ite ñnotinomo llogáuai

1 Daje izói Sárdismo ite Juzíñamuimo jaináidino úiñoraimamo bíuai cúeiri: “Afe siete dígade Juzíñamui jóriairedimie, ñi afe Juzíñamui Ñuera Joreñoredimie Cristo, íemo afe siete dígade ucúduai llíidimie dáamie. Afémie bie izói ona daide: Nana o finócana onódicue. Crísto o jainaina izóinado jica jalleide, íadi onódicueza tíidimie izói itio. 2 Come cazilla izói mai abina onoiri. Nai omo due jiza fiévide ínogafuiaina meine riire finori, mei aféfuiai jae táinocaiacadeza. Eróidicue o finócafuiai cue Juzíñamui eróicana ñue jaícina jóiñedeza. 3 O fueñe ínoga íaioi llófuiamo uibíoicairi. Afena jeire o oíri. Afe llezica o comécimo itífue ñúefuena méidori. O abina ñue onóñenia, merírifiredimie ónonino billa izói, duere omo finuaibiiticueza. Cue billíruina ónoñeítio. 4 Mei íadi ómoimona jadí Sárdismo dáarie comécina ñúemacina ite. Afémaci iníroina íaíñedino izoide. Afémaci úzecuiruai jítada cue diga jáitiaioi, mei afe daí íaioimo dúideza. 5 Fiénidena anáfenodinona jáidino úzecuirona jítaitiaioi. Iemo zíñona cáaitino mámecei cuiánicomona íaioi mámeceiaina dóñeíticue. Iemo daje izói cue Moo Juzíñamui uícomo “Bie cúemaci” dáititue; daje izói ie abi imaci ángeles daínamací uícomo “Bie cúemaci” dáititue. 6 Ñuera Joreño Juzíñamuimo jaináidinona dáinamo cacáacadimie mai áfemo cacai.” Aqué izói daide.

Filadélfiamo ite ínnotinomo llogáuai

7 Daje izói Filadélfiamo ite Juzíñamuimo jaináidino úiñoraimamo bíuai cúeiri: “Afe ñífuenidimie omo úrite. Afémie uáfueña

úrifiedimie. Afémie mo jai ai illa i ma David naze tuiñora llave ite. Afémie Juziñamui illá i mana illano tuiñóadi buna ibáinide. Daje izói afémie ibáia, buna zuitánide. ⁸ Bímie bie izói ona daide: Nana o finócana onódicue. Buna ibáinide túide naze o uiecori jóneticue. Mei figo mairiñedio, íadi cue uaina náfuetio; cuena jaca jáanofinidio. ⁹ Iemona Taifemo jaináidinona o anamo caiñícido ana íai oi dújutano óreiticue. Afémaci táinona úrillano bie izói daiífirediaí oi: “Cai bie Juziñamui nizeca judíuaídicaí” daidíaí oi, mei íadi íeñediaí oi. Nana baimaci o anamo dújutaiticue, íemona ona cue izíruillana fídítiaí oi. ¹⁰ Cue ocuica uai jeire o úamona aféuai daína izói comécina járidoñedio. Ie jira nana bíniemo bite facátalliruimona ona ñue ráruiticue. Aféruído nana bíniemo ite comini facátalliaí oi. ¹¹ Raíre biticue. Omo ite ñúefuiaí ñue rairuiri, o jirí dolle raa bu báiroñeilleza. ¹² Fiénidena anáfenodinona jáitínona cúeiena máíñoiticue. Máíñoano cue Juziñamui gairíracomo ite mairide jáilliraí izói íaí o ina óreiticue. Iemona Juziñamui illánomona jaca jino jáiñeítiaí oi. Iaí o imo cue Juziñamui máme cí cúeíticue. Daje izói cue Juziñamui jofue máme cí íaí o imo cúeíticue. Afe jofue máme cí “Comue Jerusalén.” Afe jofue cue Juziñamuimona caífo monámona ana bite. Daje izói afe fiénidena anáfenodinomo cue comue máme cí cúeíticue. ¹³ Nüera Joreño Juziñamuimo jaináidinona dáinamo cacáacadimie mai áfemo cacai.” Aquíe izói daide.

Laodicéamo ite íñotínomo llogáuai

14 Daje izói Laodicéamo ite Juzíñamuimo jaináidino úiñoraímamo bíuai cúeiri: “Uáfuenta llotímie omo úrite. Afémie jaícina uai nabáifiredímie; daje izói jaca méidoñeno uáfuenta úrifiredímie. Afémie nana Juzíñamui finócana tainérama. 15 Afémie bie izói ona daide: Nana o finócafuiaína onódicue. Ráairuillano figo o ñnoñenana onódicue. O ñnoga ñue uzírediji izóiñede. Daje izói o ñnoga caimare mánaidiji izóiñede. Ñue o uzírenana jítáidicue, nibai jíáfodo o mánaínana jítáidicue. 16 Mei íadi jabo uzírediji izóidío. Iemona jabo uzírediji jino tua izói ona jino dótaiticue. 17 Bie izói daífiredío: “Ráaredímiedicue,” daidío. Iemo “Nana cue illafue ñue jóide. Cue jitaica raana ñede,” daífiredío. Mei íadi jíáfodo o íllana onóñedio. Juzíñamui eróicana bu cáimadoñegamiedío. Iemo daje izói iere duere zefuítagao, íemo iere dúeredímiedío, íemo uina cíoiñedímie izóidío. Iemo jíai inícuironino emuíromade izóidío. Afe bie izói o íllana jaca onóñedio. 18 Mei jira omo llóiticue, “Iraimo ñue finoca órona cúemona iba, uáfuenta ráaredímiena o jáillena. Daje izói cúemona úzerede inícuirona iba, o meáire emuíromana íbáillena. Daje izói ui manórajina cúemona iba, o uimo jóoniamona ñue o cíoiliena. 19 Nana cue izíruiganona lletádicue; daje izói íaioina duere finódicue ñue íaioi íllena. Mei íemona Jesucrístomo izire o jaináicaillano, iere o ñnofireiri. O comeci ífuiaí méidori, ona duere cue fínoiza. 20 Ero cacai, come comeci naze ízoinamo iticue. Dinómona jíiriticue. Cue

uaimo cacáreitimie ie naze tuiñóadi cue llínollena, afémie illánomo jofó jáitícue. Jaillano dájena afémie diga nabáiritícue. Daje izóí conima diga caimare úritícoco. ²¹ Fiénidena anáfenodinona jáitínona, illáimana cue ráiiranomo afémiena cue diga ráitaitícue. Mei daíí fiénidena cue anáfenuamona cue Moo illáimana ráiiranomo ráinazaidícueza. ²² Ñuera Joreño Juziñamuimo jaináidinona dánamo cacáacadimie, mai áfemo cacai.” Aquie izóí daide.

4

Monamo Crístomo lloga cáimafuiai

¹ Bie méifomo éroidícuemo, monamo ite naze túinana ciódicue. Fueñe cue cacana uaina meine nane cacádicue. Afe uai vudugoi ficirena izóí cacaide. Afe uai cuena daide:

—Caifo benomo bi. Bífuiái méifomo raire cómutifuiaina omo ácataitícue, —daide.

² Afe llezica Ñuera Joreño anamo itábicaidícue. Iemona monamo ite illaíma ráiiranona ciódicue. Afénomo dáamie ráiinana ciódicue. ³ Afémie iere quérede ‘jaspe’ daina ráifide nofiji izóí éroide. Aféjina jíáifo daina ‘cornalina.’ Afe ráiirano abido rózigüeo nágafene ífoina ite. Afe rózigüeo ‘esmeralda’ daina ráifide nofiji quenírena izóí quenírede. ⁴ Iemo afe ráiirano abido veinticuatro diga jíáie illaíma ráiiranuaina nágafene ífoina illana ciódicue. Afénuaimo veinticuatro diga mona ero ocuide éicomini ráiidiaíoi. Afémaci úzerede iníroillai jíitádiaíoi. Iaiíoi ífomo oro finoína illaíma jíitáfíregacuífoi jíiena. ⁵ Afe áillue ráiiranomona aillo boride. Afe llezica afénomona iere ficire mona giria cácaide. Iemo afe ráiirano uícomo

siete dígade áillue bobáieniai bóoide. Afe siete diga bóoide bobáieniai Juzíñamui Ñuera Joreño jana. ⁶ Dáanomo afe ráirano uícomo, daa monáillaina eroide illa. Afe monáillai anáfenemo ñue cíoide vidrio izoide.

Afe ráirano abido cuatro diga cáadimíai ífoina itíai. Afémaci erófene dibénemo aillo uíjai ite. Daje izói emodo dibénemo ite. ⁷ Bimácimona daa jánallarina eroide. Iemo jíai juráreto ítona eroide. Iemo jíai uieco, come uiecona eroide. Iemo jíai feede máajaiñona eroide. ⁸ Afe cuatro diga cáadimíaimo illa dígamíemo seis diga íaicuai ite. Afe íaicuai erófenemo uíjaina oruide; daje izói emodo dibénemo ite. Afémaci mona naio diga líicaiñeno úritíai; Juzíñamuina daiíoidíai:

¡tere íaifuenidío! ¡tere íaifuenidío! ¡tere íaifuenidío!
tere ñuera cai Ocuíraimadío.

Jamánomo ríinorede Juzíñamuidío.

Jaca nanómona itímiedío,

Iemo nai birui itímiedíoza,

Iemo uire jaca ninomo zíiñona íitímiedíoza, —daií daiíofiredíai.

⁹ Illa dígacaiño afe cáadímaci, ráirranomo ráide Moo Juzíñamuimo ebíredífue nitáadi, íemo ñúefue jóneadi, íemo jíai figura íena dáíadi, ¹⁰ afe llezica afe veinticuatro diga ocuide éicomini áillue ráirranomo ite Juzíñamui anamo dújufiredíai. Iemo afe jaca ninomo zíiñona íitímiena caimátaidíai. Afe llezica íai oro finoina illaíma ífo icuífui ráirano uícomo jónefiredíai. Jóneta daiífiredíai:

¹¹ Cai Ocuíraíma Juzíñamui,

Iere ebíredifue omo nitáregaza,
 Daje izói ñúefuiai omo jónefiregaza.
 O jamánomo ríinorenana omo nitáregaza.
 Nana aféfuiai ona náamaredeza.
 Mei naga ráaniai o comuítaga.
 Iemo o comeci jítaina izói itáioiza.
 Daje izói o comeci óiacanamona finócaiaioi.
 Aquie izói daiífirediaioi.

5

*Ráiidimie líiga rabénicono ciódicue naa Cordero
 daínámie Cristo diga*

¹ Afe méifomo illaíma ráiiranomo ráiidimie nabézimo ite rabénicono ciódicue. Afénico ferínoga rabe. Erófenemo cuega, daje izói jinófenemo jíái cuega. Afénico siete diga sello daina ñue ibaira raado ibaica. ² Iemo riírede ángel daina Juzíñamui abi ímiena ciódicue. Afémie ficírede uaido jicánofirede; daide:

—¿Bie sello mei cuatállena bu ñuena? ¿Bumo ñue dúide binico tuiñóllena? —daide.

³ Mei íadi afénico tuiñoitimiena iñede. Caífo monamo iñede. Biniemo iñede, íemo bínie anamo tíidino illánomo jíái daje izói iñede. Daje izói afénicomo buna eróinide afe facádollena. ⁴ Afénico tuiñoite comécina ñuemiena baiñénamona iere éedicue. Daje izói afénico facádoitimie iñénamona, íemo jíái afénicomo eróillano ónoitimie iñénamona, iere éedicue. ⁵ Iemona veinticuatro diga eicomínimona dámie cuena daide:

—Mai benómona éeñeno o iri, mei Judá nairai illaíma Jánallarina mamécamie, fiénidena jae ñue anáfenotateza. Afémie jaiái illaíma David erófene

igímamona comuídime. Afe ie anáfenuamona afémie binico tuiñolle ríino ote. Daje izói afe siete dígade sello cuatalle ríino íemo ite, —daide.

⁶ Iemona afe ráirano cígimo, íemo afe cuatro diga cáadimiai cígiri, íemo afe veinticuatro diga éicomini cígimo, Cordérona mameca Crístona ciódicue. Afémie táide, mei íadi Juzíñamuimo fia fecállena ie íaioi fáina meifo cioide. Afe Cordero siete diga zícairede, íemo ie ui siete dígade. Afe siete dígade uíjiai naga éniiaimo oreca Juzíñamui Ñuera Joreño jana. ⁷ Afe Cordero illaíma ráiranomo ráidime nabézimo ite rabéniconá llinuaide. ⁸ Afémie afénico llinua llezica afe cuatro dígade cáadimiai, íemo afe veinticuatro dígade ocuide éicomini afe Cordero anamo dújudiaioi. Afe eicomínimona illa dígamie ‘arpa’ daína rua roia taiga raa lliediaioi. Daje llezica afémaci oro finoína ugúciaina oruide ichecoí lliidiaioi. Afeniai Juzíñamuimo jaináidino afémiemo jicara uailai jana. ⁹ Afe éicomini bie comue rua rotiaioi:

O iere comécina ñúemienamona bie rabénico llinota tuiñolle omo dúide.

Mei nauí Juzíñamuimo fatá fecácamedioza.

Caina o die tóillado Juzíñamui íena ibá dioza.

Uáfuena nágaziemona,

Iemo nana jíáífo úritinomona,

Iemo naga comini jófuiaimona,

Iemo nana náiraiamona Juzíñamui íena caina ibá dioza.

¹⁰ Cai Juzíñamui ie illáinina caina jáitatio;

Daje izói comínido Juzíñamuimo úrifireitinona
caina jóonetio;

Iemona énie náiraiaina ócuiticai.
Aquie izói rotíaiói.

¹¹ Afe mei eróidicue. Iemo aillo afe illaíma
ráiiranomo ífoina ite ángeles daina Juzíñamui abi
imaci úrilla uaina cacádicue. Daje llezica afe cua-
tro diga cáadimíai uaina cacádicue. Iemo dáaruído
éicomini uaina cacádicue. Afe Juzíñamui abi imaci
iere jamánomo aillo itíaiói. Ua millones y mil-
lones dánaze itíaiói. ¹² Afémaci fícirerie úritíaiói;
daidíaiói;

Fatá Juzíñamuimo fecaca Cordero comécina iere
ñúenamona ñuera ríino maiñolle afémiemo
dúide.

Daje izói aillo ráifide ráaniai dáamiemo dúide.

Iemo ifoci déillafuiai dáamiemo dúide.

Iemo nana ñuera máirie dáamiemo dúide.

Iemo nitárega ñúefue dáamiemo dúide.

Iemo ñuera ébifue dáamiemo dúide.

Iemo aillo afémiemo caimátaille uai afe Cordéromo
dúide.

¹³ Afe llezica nana Juzíñamui comútaganuiái
úrilla uaina cacádicue: nana monamo itínuiái, daje
izói éniemo itínuiái, daje izói énie anamo itínuiái,
daje izói monáillaimo itínuiái, naa afénuiáimo
itínuiái úrilla uaina cacádicue. Daidíaiói:

Nana caimátaille uaillai illaíma ráiiranomo ráiide
Moo Juzíñamuimo íredeza,

Daje izói jíái Cordéromo íredeza.

Afe izói ñúefue afe íaillinoímo nitáredeza, naa ñuera
ébifue diga,

Iemo ñuera ríino íaillinoímo íredeza.

Nana aféfuiai íaillinoimo nana fimónaiaido, jaca
ninomo zíñona daí daírenaza.

¹⁴ Iemo afe cuatro diga cáadimíai aiáirilla izói
daídíaioi:

—¡Daiítadeza! —daiíoifirediaioi.

Iemo afe veinticuatro dígade éicomini ana
dújuillano, jaca ninomo zíñona cáadimíemo
caimátaioifirediaioi.

6

Siete dígade sello daina rabénico ibaira rafue

¹ Cordero afe siete dígade séllomona nánora
tuñuana ciódicue. Daje llezica cuatro dígade
cáadimíaimona dáamie dainana cacádicue. Ie
úrilla uai, mona giria ficirena izói ficirede. Daide:

—Mai eróizaibi, —daide.

² Cue eroilla llezica úzerede cabállona ciódicue.
Afe emódomo ráicaidimie zicuirá llíicaide.
Iemo illaíma ifo icuífoina ie jitádiaioi. Jita mei
afémie naga náiraina anáfenocana jaide. Ie mei
nágaruillaído afémie íaioina anáfenofirede.

³ Méifoide séllona Cordero cuata llezica, tórna
éroide cáadimie úrillana cacádicue. Afémie:

—Mai eróizaibi, —daide.

⁴ Afe llezica jáirede caballo jino bíllana
ciódicue. Afe emódomo ráicaidimíemo féitalle
ríino afémíemo iga. Afémie nana nairai caimare
uái illa féitaita, comini conímana fazítallena. Afe
llezica áillue lloébicina afémíemo iga.

⁵ Iemo Cordero nane jíáie tercer daina sello
cuata llezica, jíáie cáadimie úrillana cacádicue.
Afémie:

—Mai eróizaibi, —daide.

Jira eróidicue. Eróidicuemo daa jítirede cabállona ciódicue. Afe emódomo ráiicaidimie mérenana onóillena facara raa lliicaide. ⁶ Iemo cáadimiai cigimona dáamie úrilla uai cacádicue. Aféuai daide:

—Daa kilo trigo daa mona táijina fidi. Iemo daámani kilo cebada daa mona táijina fidi. Iemo aceite vino diga jaca jeruúredeza, mei afe iballe úcube iñédeza, —daide.

⁷ Afe mei Cordero jiáie ‘cuarto’ daina sello cuata llezica, cáadimiai mona íraimie úrillana cacádicue. Afémie:

—Mai, eróizaibi, —daide.

⁸ Eróidicuemo borárede cabállona ciódicue. Afe emódomo ráiicaidimie titáfiredimie dainámie. Afémie óodana tidino illano jana maméidimie bite. Enie cuatro diga fecácamona dáanie íemo iga, afénomo riire ocuúllena. Afénomo comínina fuiríllado íaioina tícoizitaite. Iemo daje izói júbiedo íaioina tícoizitaite. Iemo dúicuaído íaioina tícoizitaite. Iemo éniemo ite illáirede rílleniai íaioina tícoizitaite.

⁹ Afe mei Cordero jiáie ‘quinto’ daina sello cuata llezica, ‘altar’ daina Juzíñamui caimátaitarano anamo ite, titaca comini coméciaina ciódicue. Afémaci Juzíñamui uai llócailla ícoinia titácaiaioi.

¹⁰ Afe bimaci ficire úritiaioi; daidíaioi:

—Íaifuenide cai Ocuídimie, uícodo o llógana méidoñeno ñue fuitáfiredio. Eniemo ite cai titádino iere jicánota duere o finóllena, ¿nié dinó nai moziñoitio? Cai fatino iba o ollirui, ¿nigarui nai bai dúiñoitio? —daidíaioi.

11 Mei jira afe altar anamo itímaci úzecuiruaina igáiaioi. Afe llezica nai nano íanori ocózinaitagaiaioi. Mei nana íaioi tílla izói uire titállino, Juziñamui mámianomo nai dúciñede. Afe titállino, nauí íaioi titaca ámatiaí izói, Cristo uaimo táijifirediaioi.

12 Cordero nane jáie ‘sexto’ daina sello cuata llezica, eródicuemo, énie iere jacire docaide. Iemo jítoma zúnaillana, jítaca jítiroi izói éroide. Afe llezica fiui náauina jáirede die izói méidoficaide.

13 Afe dáaruido mona ero ucúduai cocidiaioi. Ua, higuera daina amena llizilla, jairifo riire begüñuamona cócia izói, afe izói ucúduai ana bíñiemo cocidiaioi.

14 Afe llezica, rabe jofo ferírioicailla izói, mona ferírioicaide. Iemona cióbicañena. Iemo dáaruido nana caifóneduai naa monáillai cigi íduai íaioi illánomona oni jírecaide.

15 Iemona nairai illaini caifóneduai anamo ite ífuaimo, naa jéerie noficiaí cigiedo retáiritiaioi. Afénomo jamánomoidino daje izói retáiritiaioi. Iemo aillo ráanaitino, íemo fuiríraini illáicomini, íemo iere riíredinuiaí, íemo nana jacire rairuícano, daje izói buna ráiruiñegano, nana afénomo retáiritiaioi.

16 Afémaci caifóneduaina jéerie noficiaína daiífirediaioi:
—¡Mai caimo baii! Mai caina jiita, baie illaima ráiiranomo ráiide Juziñamuimona caina rétaido. Cordero finolle jacire cai duere finóllifuemona caina rétaido, —daiífirediaioi. 17 Mei jii, iere jacire comini duere finóllirui jae dúcideza. ¿Bu mei áfena moziñorena?

Israel náiraimona náamana onóillena cuezámaciai

¹ Bie méifomo bínie fuédaiaimo cuatro dígade ángeles daina Juziñamui abi ímíai, naidáienana ciódicue. Afémaci nágafeniaimona jairifo jáiñuana moziñotiaioi. Afe éniemo jairifona jaiñótañediaioi, daje izói monáillaimo jaiñótañediaioi, íemo jái aménaiaimo jaiñótañediaioi. ² Iemo jáiie Juziñamui abi ímíena mona móimona bíllana ciódicue. Afémie caade Juziñamui íeie daiíllena sello daina jóonelle raa llíicabite. Afémie ficire úrite. Enie fuédaiaimo cuatro díga naidáidímíaimo úrite. Afémaci bínie fiéni íaioi finolle, naa monáillai díga ríinona igámaci. Afémacina bímie daide:

³ —Cai Juziñamui ocuífireganomo, íaioi ozócimo náamana onóillena mámece nai jóoneña llezica, nai bíniéna duere finóñeno iri. Daje izói monáillai naa aménaiai raire duere finóñeno iri.

⁴ Jónia mei, nígamaci náamana onóillena mámeceina jóonegano íaioi número na cacádícué. Nana Israel náiraímo itíziaimona afe cuezano ciento cuarenta y cuatro mil dígade.

⁵ Judá izíemona doce mil díga cúefide.

Iemo Rubén izíemona doce mil díga cúefide.

Iemo Gad izíemona doce mil díga cúefide.

⁶ Iemo Aser izíemona doce mil díga cúefide.

Iemo Neftalí izíemona doce mil díga cúefide.

Iemo Manasés izíemona doce mil díga cúefide.

⁷ Iemo Simeón izíemona doce mil díga cúefide.

Iemo Leví izíemona doce mil díga cúefide.

Iemo Isacar izíemona doce mil díga cúefide.

⁸ Iemo Zabulón izíemona doce mil díga cúefide.

Iemo José izíemona doce mil díga cúefide.

Iemo Benjamín izíemona doce mil diga cúefide.

Aillo dáanomo úzecuiruai jítada gairídino

⁹ Afe méifomo eróillano jamánomo aillo comínina ciódicue. Nana náiraiamona dáanomo bitíai. Daje izói nágaziemona bitíai. Iemo daje izói jiáifo úritinuiamona bitíai. Iemo daje izói naga jófuiamona bitíai. Nana bimaci illaíma ráirano uícomo naidáidiai. Daje izói Cordero uícomo naidáidiai. Afénomo aillo itíaiza buna facádonide. Nana afémaci úzecuiruai jítáoidiaí. Daje llezica afémaci rafóruai líiediaí. ¹⁰ Nana fícirerie daídíaí:

Cai jíllonano, illaíma ráiranomo ráide cai Juzíñamuimona comuide.

Daje izói cai jíllonano Cordéromona comuide, daídíaí.

¹¹ Afe llezica nana Juzíñamui abi imáciaí, illaíma ráirano onido ífoina naidáiediaí. Daje izói veinticuatro dígade éicomini onido ífoina naidáiediaí. Iemo jiái cuatro diga cáadimíai onido ífoina naidáidiaí. Afémaci afe ráiranomo ráidimie anamo éniemo fueco diné bíjicaidiaí. Bíjicaillano Juzíñamuimo caimátaidiaí. ¹² Daídíaí:

¡Bie izóideza! Núefuai nitalle cai Juzíñamuimo dúide, ñue ebíredifuaí diga.

Daje izói nana ñue onóigafue íemo dúide, naa figora daíífrena diga.

Daje izói afémiemo nitárede ñúefue dáamiemo dúide, naa áillue máirie diga.

Nana bífuaí cai Juzíñamuina jaca ninomo zíñona daí daírenaza.

Aquíe izóideza, —daídíaí.

13 Afe mei afe eicomínimona dáamie cuemo jicánote:

—¿Baie buoi úzecuiruai jitáoina? ¿Afémaci mei ninena bitíaiói? —daide.

14 Jira íena daidicue:

—Afena onóñedicue. O ñue onódio, —daidicue.

Iemo afémie cuena daide:

—Bimaci aillo duere zefuilla ícoimo jino bitino. Afémaci comécina iere íaifuenino íaiói íllena ja Cordero díedo muiñócaza. Afémaci iere úzecuiro inícuero illa izói itíaiói. 15 Ie jira Juzíñamui ráirano uícomo itíaiói. Afe llezica nágaruillai, mona naio diga, Juzíñamui gairíraco ero ie ocuállana finófrediaíoi. Iemo afe ráiranomo ráide Moo Juzíñamui, íaiói diga íllado jácifuemona íaioina ráiruite. 16 Afémaci jaca júbiemona duere finóbiñeitiaíoi. Daje izói jiróacanari duere zéfuiñeitiaíoi. Iemo jitoma íaioina jíái úzitañeite. Daje izói uzírediruimo mona uzírena íaioimo uzire cácañeite. 17 Mei illaíma ráirano abímo ite Cordero, ovejai uíñua izói íaioina uíñoiteza. Afe llezica ñuera jainoi jino toránuaído íaioina ífóicaite. Afe jainoi zíiñona cáatatiji. Iemo afémaci éeadi Juzíñamui íaiói ui jeme nana oni dóite.

8

Iraie sello cúatajana cioide, oro finoína uguci uillítara diga

1 Iemo Cordero llíiga rabénicomo ite íraie sello dáina íbáioide raa cuata llezica, daa hora átuedo mona tii daííñoaide. 2 Afe mei siete dígade Juzíñamui abi imaci Juzíñamui uícomo naidáienana cíódicue. Afémaci siete diga vudugoi izoide

raana igáiaioi. ³ Afe mei jíáie ángel dainámie Juzíñamui abi ímie oro finoina uguci uillítara llícabillana ciódicue. Afémie altar daina Juzíñamui caimátairano uícomo naidaide. Iemo aillo ugúciai afémiemo fecácaza, áfena Juzíñamuimo uillítallena. Mei nana Juzíñamuimo jaináidino afémiemo íaioi jicáfirena uaillai llua llezica, bímie dánomo afe ugúciai Juzíñamuimo uillítaiteza.

Afe Juzíñamui ráirano uícomo ite oro finoina ie caimátairanomo, bímie afe ugúciai jutade; íemo afe llezica afe Juzíñamuimo jaináidino jicáfirena uaillai llócaigaza. ⁴ Afe uguci uillie, Juzíñamui abi ímie áfena altarmo juta mei, Juzíñamui uiécomo caifo uillíoicaide, nana Juzíñamuimo jaináidino jicáfirena uaillai diga. ⁵ Afe mei Juzíñamui abi ímie uguci uillítara raa llínote. Llínuano altármona oga caade iráiciaina áfena oruítate. Daií fínuano ana éniemo dotade. Afe dota llezica mona jacire giride naa ficíriede raari. Iemo aillo améuai llairide. Iemo énie jacire docaide.

Siete dígade vudúgoina eroide raa

⁶ Iemo afe siete dígade vudúgoina eroide llíide Juzíñamui abi imáciai afe vudugoi fúunollena maméritiaioi.

⁷ Nanóidimie fúunua llezica, jéerie nocíjiaí éniemo cocítate. Afe dáaruido réici diga die taméricaide éniemo cocítate. Afe cóciamona éniemona jarífenie boode. Daje izói nana aménaiaimona jarífenaiaí boode. Daje izói nana caade ráitiaimona jarífene boode.

⁸ Afe meifo Juzíñamui abí ímie ie vudugoi fúunua llezica, boode áillue íduna éroide raa monáillajimo dotaina. Iemona monáillajimona jarífeido díena jaide. ⁹ Afemona nana afénomo ite caade chámuniaimona jarífeniaí aillo tícoizitiaíoi. Daje izói afénomo ite jéerie bárconiaimona jarífenedo aillo niné táinocaidiaíoi.

¹⁰ Iemo jíáie Juzíñamui abí ímie ie vudugoi fúunua llezica, áillue ucudu monámona éniemo baíide. Afe ucudu bobaie izói boode. Afe bóodicudu nana imánillaimona jarífemanimó baíide. Daje izói éniemona jainoi jino toránuaíimo baíílla.

¹¹ Afe ucudu mámece Eríredicudu. Iemona nana imánillaimona jarífemanillaí eríriede. Iemona afe jainoi erire jáillamona aillo comini tíidiaíoi.

¹² Ie mei nane jíáie Juzíñamui abí ímie ie vudugoi fúunua llezica, jítómamona jarífetomado jítirecaide. Daje izói fiuímona jarífeuido jítirecaide. Iemo jíái ucúduaíimona jarífecududo daje izói jítirecaide. Ie jira nana afémacimona jarífenedo jítirecaide. Naga mona naio diga jarífemonana egáíñoñediaíoi.

¹³ Afe méifomo caifo monamo éroidicue. Afe mona erodo feede Juzíñamui abí ímie na cacádicue. Afémie ficire úrioicaide. Daide:

—Aii. Eniemo ite comini nii dúerena; mei Juzíñamui abí imácimona daámani nai fiébide vudugoi fúunollena. Afémaci fúunua llezica énie imaci, ¡Nii duere zéfuitiaíoi! —daide.

9

¹ Iemo nane jíáie Juzíñamui abí ímie ie vudugoi

fúunua llezica, daa ucudu monámona éniemo baiillana ciódicue. Iemo fiénide jóríai ibáirafo zuitara llave afe ucúdumo iga. ² Afemona afécudu aféfonta tuiñode. Tuiñuamona aféfonta jacafai bóua uíllia izói caifo uillide. Aféfonta caifo uillide uíllie jitómana dúitate. Afe llezica mona erona jítire finode. ³ Afe uílliemona bíniedo feede fíuái comuide. Afémaci, éniemo ite acáiduai izói molléroirediaíoi. ⁴ Afémaci ráitie güllena rairuícaiaíoi. Daje izói nana amena rábiaína guitatañegaiaíoi, naa jíáie mócore zicode ráaniaí digá. Daa comini duere finóllena orécaiaíoi. Mei íadi dani Juzíñamui ie daítate mámece ozócimo cúeñeganona, afe fíuái duere fínoitiaíoi. ⁵ Mei íadi afe fíuái comínina títatañegaiaíoi. Mei jíáfodo afémaci cinco digá fiui comínina izi cácataitiaíoi. Afe fíuái mailla, acaido come mailla izói izíreite. ⁶ Iemona aféruillaído comini, “Raire cue tílli” dáitiaíoi, mei íadi tíñeitiaíoi. Iere tíiacaitiaíoi íadi, títáfirede raa afémacimona oni jica jáite.

⁷ Afe fíuái jóbairizaillena mamérilla cabállona eróidiaíoi. Iaiói ifócimo oro finoina illaima ifo icuífoina éroide jíina. Iemo íaiói uiéco come uiécona éroide. ⁸ Iaiói ifótii ringo ifótina éroide. Iaiói ízie ‘león’ daína jánallari íziena éroide. ⁹ Iemo llojécuiroi izoide abi ríidote icogí íaiói jogóbemo jíide. Iaiói féeoína jamánomo ficírede. Uafue, jóbairizailla caballo zonóicaiga ‘cárroniaí’ ficírena izói ficírede. ¹⁰ Iemo afémacimo ite ooda acaido ooda izói molléroirede. Afe óodamo cinco digá fiui comini duere finolle ríino ite. ¹¹ Afe fíuái illaima ite. Afémie fiénide jóríai ibáirafo úiñotimie. Afémie

mámeci hebreo uaido Abadón; íemo griego uaido Apolión. Afeci daiíacade “Níné táinocaitaitimie.”

¹² Nanoide jacire izi cacánafue jae záaide. Mei íadi nai mena fiévide.

¹³ Iemo nane jíáie Juzíñamui abi ímie ie vudugoi fúunua llezica, Juzíñamui uícomo ite oro finoína altar daína afémiemo caimátairanomona úrilla uaina cacádicue. Afe uai afe caimátairanomo ite cuatro dígade caifo fáide zicai cigimona cácaide. ¹⁴ Afe uai jae vudugoi fúunote Juzíñamui abi ímiena daide:

—Afe cuatro dígade Eufrates imani abimo cuinaca ángeles izóidino mai zuitari, —daide.

¹⁵ Jira zuitácaiaioi, nana comini jarífenairaido titállena. Mei aféruimo dúcinamona bai óllena eneno mamécaiaioi. Daje izói biruimo dúcinamona mamécaiaioi. Daje izói bie fiui íena mamécaiaioi. Iemo daje izói bie fimona íena mamécaiaioi. ¹⁶ Afe cuatro diga ángeles ocuúllino aillo ite. Nana afémaci cabálloniai emódomo ráiiediaioi. Iemo afémaci dígadíaioi daínana cacádicue. Afémaci doscientos millones dígadíaioi.

¹⁷ Bie izói éroide cabálluai nicaído ciona izói ciódicue. Afe cabálluai emódomo ráiidino jogóbiaimo llojeco jitáoidiaioi. Afe llojécuiromo jáiare, mócore, borare cueda. Iaiói cabálluai ifo ‘leon’ daína jánallari ifona éroide. Afémaci fuémona irai izói jino bite, íemo uíllie bite, íemo daje fuémona nairai iere uzire cóonaitalle raa jino bite. ¹⁸ Afe cabálluai fuémona bite daámani jacire táinocaitate ráamona aillo nairai fuite. Uafue, nana cominimona jarífenairai tíidiaioi. ¹⁹ Daje izói afe cabálluai ódamo jacire títaite riino ite, mei afe

ooda jaiona eróideza; ifóredeza. Afedo comínina ainízicana uite.

²⁰ Mei íadi tíidinomona fiébidino, baie daámani jacíredemona tíñedino, íaioi finófireiga fiénidifuiái féitaacañediaioi. Daje izói fiénide jóriaimo caimátaitajana fáicanocaiñediaioi, naa jiáiforie finoca jánaraiaína. Dáarie afe jánaraiai oro finoína, jiáie plata finoína, jiáie bronce finoína; íemo jiáie nofici finoína, íemo jiáie amena finoína. Nana bie jánaraiai jaca cióñede; daje izói minícana cacáñede, íemo daje izói macáñede. ²¹ Afe fiébidino jiáimaci méiniana fáicanocaiñediaioi. Daje izói jiáima fue gáiana fáicanocaiñediaioi. Daje izói íaioi jiruínana féitañediaioi. Daje izói íaioi merírifirenana féitañediaioi.

10

Daa ángel daínámie Juzíñamui abi ímie duera rabénico llíide

¹ Afe méifodo riírede Juzíñamui abi ímie monámona ana bíllana ciódicue. Afémie uíllie cígido bite; íemo afémie ifomo rózigüeo izoide jíina. Ie uieco jitoma egáñua izói quenírede. Iemo ie idai boode jaíillirai izói éroide. ² Afémie daa duera rabénico tuiñoda llíide. Ie idai nabezi monáillaimo bitade, íemo ie jarífezi éniemo bitade. ³ Iemo jánallari ficire írilla izói ficire úrite. Afémie úrilla mei, mona siete dígacaiño giride; ie gíría come úrilla izói cácaide. ⁴ Afe siete dígacaiño mona gíría llíicailla mei, íaioi daína uaillai cúeiacadicue. Mei íadi cúeiacadicuemo monámona daa uai cuemo úrillana cacádicue; daide:

—Afe siete dígacaiño mona gírĩa uailai rabemo cueñeno iri; báinino comécimo o jóoneri, —daide.

⁵ Afe mei afe monáillaimo naidaide, éniemo naidaide Juzíñamui abi ímie, ie onoi nabezi monamo zitáaide. ⁶ Afe llezica ziiñona ite Juzíñamui mámeçi llíinuano riire úrite. Afe dáaruído énie comuítatimie mámeçi, daje izói monáillai comuítatimie mámeçi, íemo nana afénomo ite cáadinuiai comuítatimie mámeçi llíinota riire daide:

—Benómona jaca ja móziñoñelleza. ⁷ Jabe siete dígademona íraimie Juzíñamui abi ímie ie vudugoi fúunolliruimo dúcille llezica, Juzíñamui jica ia comécido báinino mamécáfue, ñue ícoimo zaité. Daií Juzíñamui ie uai jino llórainimo jaiái uícodo llote. Afémaci dani ie ocuífíregano, —aquie izói daide.

⁸ Naui monámona cue cacana uai nane meine cuemo úrite. Cuená daide:

—Afe éniemo monáillaimo naidáidimie ónoimo ite túide duera rabénico mai llíinuai, —daide.

⁹ Jira afe Juzíñamui abi ímiemo afe duera rabénico jícajidicue. Jicádicuemo afémie cuena daide:

—Llíinota mai güi. Afe duera rabénico o fuemo cíiji naimérena izói cácaite, mei íadi o jébemo erire cácaite, —daide.

¹⁰ Mei jira Juzíñamui abi ímie ónoimona afe duera rabénico llíinota güitícue. Güitícuemo cue fuemo cíiji izói naimere cácaide. Mei íadi afe ja cue güilla méifodo cue jébemo erire cácaide. ¹¹ Afe mei cuena daidíaiói:

—Juzíñamui daina aillo comini jófuiaimo cómuítufuiai, meine dāanomo llóredioza. Daje izói aillo náiraiaina Juzíñamui dāinana llóredioza. Iemo daje izói jíáiforie úritinona Juzíñamui dāinana llóredioza. Iemo jíái aillo illáinina Juzíñamui dāinana llóredioza, —aquíe izói daidíaioi.

11

Uai nabáifrede íaillinoi

¹ Afe mei ápera rázina cuemo itíaioi. Afezi jofó facáradozina eroide. Afezi cuemo fécano cuena daidíaioi:

—Mai náidacaillano dama Juzíñamui gairíracó nie dínóride fácaji. Daje izói Juzíñamuimo caimátairano o fácaji nie dínóride. Afe llezica afénomo nieze afémiemo caimátaidimacina ite mai fácado. ² Mei íadi afeco jinófebiri facáñeno o iri; mei afeno jícanemacimo dúideza. Afémaci Jerusalén daina íaifuenide jófuena cuarenta y dos díga fiuido fieni anáfenoitiaoi. ³ Iemo cue dibénedo úrillena uai nabáifrede íaillinoina óreiticue; come zuure ia jíaca jíticuro, jítaítaillinoi. Afe íaillinoi mil doscientos sesenta dígaruillaí cuedo úritiaillinoi. (Afe mil doscientos sesenta dígarui, cuarenta y dos díga fiui.)

⁴ Bie cue uai nabáifrede íaillinoi ménade olivo amena izóidiaillinoi. Daje izói afe íaillinoi binie comuítate Juzíñamui uícomo jóonega mena boode áillue lámpara izóidiaillinoi. ⁵ Dáamie íaillinoina fieni finóacaniadi, afe íaillinoi fuémóna irai orédiaillinoi, afe íaillinoi fáiacadinona náamiéna cuarítallena. Nana íaillinoina fieni finóacadinona daíí títaiteza.

6 Bie cue uai nabáifirede íaillinoimo monámona noci bítañede ríino ite. Afe íaillinoi Juzíñamui dibénedo úricaille dinó, nocina bítañeitiaillinoi. Daje izói jainoi díena ória ríino íaillinoimo ite. Iemo jíái comini duere fínoite nana jacírede duico comúitaja ríino afe íaillinoimo ite. Afe íaillinoi comeci óiacana dinori comínina duere finórediaillinoi. 7 Mei íadi afe íaillinoi táijina fuilla mei, iere jacire éroide caade rille afe fiénide jóriai íbáirafomona jino bite. Jino billano afe íaillinoi díga fúirite. Fuiríllano íaillinoína anáfenoite. Anáfenua mei íaillinoína títaite. 8 Iaillinoi tílle mei, cai Ocuíraima coráinanomo, nñ afe Jerusalemo, afe áillue jofue cigi iomo, íaillinoi tíide abi fiénocaigaiaillinoi. Afe jofue mámece, fiéni íllana onótate uaido Sodoma daina. Daje izói jíái Egípto daina. 9 Iemo daruíamani átuedo díga jófuiái nairai afe íaillinoi abi tíllamo acáritiaíoi. Iemo íaillinoi abina raitátañeitiaíoi. Daje izói dígazie íaillinoi abi bínamo acáritiaíoi, naa jíáifodo úritinuiári. 10 Bíníemo ite comini afe íaillinoi tíllari iere íóbidiaíoi. Daje izói caimare íitiaíoi. Afe caimare íaíoi íllamona conímamo ráaniána raiñóñeno fécaitiaíoi. Mei afe íaillinoi Juzíñamui dibénedo úricaila llezica, bimácina iere duere zefuítatiaillinoiza. 11 Mei íadi daruíamani átuedo jailla méifomo Juzíñamui afe íaillinoína meine abido cáatate. Iemo meine abido íaillinoína macátate. Iemona íaillinoimo acáritino jamánomo jacínaitiaíoi. 12 Afe mei afe uai nabáifirede íaillinoi monámona ficírede uaina cacade. Aféuai íaillinoína daide:

—Caifo bené bi, —daide.

Jira íaillinoína éoidino éroidemo, caifo mona uílliedo monamo jáidiaillinoi. ¹³ Afe íaillinoi jailla llezica énie iere riire docaide. Afe riire docáillamona afe áillue jofue diez díganodemona dáagobe nana jáicoizite. Afemona siete mil comini tícoizitiaioi. Afemona fiébidino iere jacinaitiaioi. Jacinaillano monamo ite Juzíñamuina caimátadiaioi.

¹⁴ Méifoide iere jácifue ja záide, mei íadi íiraie bille ja rairede.

Siete dígade vudugoi fúunotinomona ja íraimie fúunote

¹⁵ Siete dígade ángeles daínamací Juzíñamui abi ímiaimona íraimie ie vudugoi fúunote. Fúunua llezica, monámona díga ficire úrilla uaillai cácaçaila; daidíaioi:

—Nana bínie illaini illáimaillano naa íaioi ocuicanuairi ja dájena cai Juzíñamuimo, íemo ie Crísto mo jaináitaga.

Iemo afe Cristo jaca ninomo zíñona ócuifireite, — daidíaioi.

¹⁶ Iemona Juzíñamui uícomo ráide veinticuatro dígade éicomini íaioi illaíma ráíranomona ana bíjicaidiaioi. Uáfueza, afe úrilla llezica éniemo fueco diné bíjicaillano, Juzíñamuina caimátaitadiaioi. ¹⁷ Iena daidíaioi:

Ona figura daidícaí.

Jamánomo ocuide Juzíñamuidioza.

Birui ítimiedioza, íemo jaiái nanómona ítimiedioza, íemo jíái jaca ninomo zíñona ítimiedioza.

Figura ona daidícaí, mei o áillue ríino maiñódioza.

Máinuano ja nane como ocuizaidioza.

¹⁸ Náirai icirinaizitiaoi, mei íadi íaioi duere o finólliruimo ja dúcizaide.

Daje izói tíidino iere riire o jicánolliruimo ja dúcizaide.

O dibénedo úrite o ocuífireganomo íaioiena o mameca ñúfuiaina íaioimo fécaítio.

Daje izói o uaina ñue ínofirede ñue finócanomo íaioimo dúide ñúfuiaina fécaítio;

íemo daje izói o mámecina jifánodoíñeno ñue llínotinomo íitio.

Uáfueza, jamánomoidimíemo,

daje izói jamámiemo íaioimo dúide raana íaioimo ífiredio.

Daje izói bínie ñúemacina fiéniruitadino o táinocaitalliruimo ja dúcizaide.

Aquíe izói afe écomini daídíaioi.

¹⁹ Iemona monamo ite Juziñamui gairíraco tújicaide. Aféno mo Juziñamui comini diga camare úrira raa uáfori cíocaide. Afe úrira raa emodo órona íbaica caja. Afe eromo Juziñamui lloga uailai éenotiaioi. Afe gairíraco tújicailla llezica améuai riire llairide, íemo ficíriede ráaniai cacaide; íemo mona ficire giride; íemo énie iere riire docaide; íemo iere maíride nocíjiaí cocide.

12

Ringo íemo jacírede zicínaimana eróidimie diga monamo cíocaide

¹ Afe mei monámona jacírede onótate raa cíocaide. Aféno mo iníroido ferínua izói, jitómado ferínoga ringo cíoina. Afengo ídai anamo fiui

cióina, íemo afengo ifomo doce dígade ucudu illácuifoí, illaíma jítáfiregacuifoí izoide jítáoide. ²Afe ringo úrue jocóacade izínailla. Afe iere izírenari caillícade; mei afengo úrue jéiciacana llezica iere duere zefuídeza. ³Afe méifodo jíáie jacírede onótate raa monamo cíocaide. Afénomo áillue jíairede jacírede zicínaimana eróidímie cíocaila. Afémie siete díga ifórede. Iemo afémie diez díga zícairede. Afe ifóciaímo illa dígacímo illaíma jítáracuifoí jíina. Daa ie mámeçí Taife. ⁴Ie óodado monamo ite úcuaimona jarífecuduna aillo dánomo jainánote. Jainánuano afécuduaína ana éniemo dotade. Afe ‘dragón’ daína zicínaimana éroidímie, afe úrue jocóacade ringo uíécomo jóoneoide, afe ie jocóacaga úrue jócua llezica raire ríllena. ⁵Iemo afe ringo ííza jocode. Afémie uire móonaia nana náiraiaina llojébici izóidedo riire ócuifireite. Afe úrue jócua méifodo Juzíñamui bairoca. Bairoda ie illáimana ráiiranomo uiga. ⁶Afe llezica afe ringo táizicimo botade. Afe dínomo afengo retáirillino uícodo Juzíñamui finoca. Afénomo mil doscientos sesenta díga mona afengo ecáecaille.

⁷Afe méifodo áillue fuiríacana caífo mona eromo comuide. Afénomo Juzíñamui abi imaci illaíma Miguel naa jíáie Juzíñamui abi imáciari afe dragón díga fuirídiaoí. Daje izói afe dragón naa ie abi imáciari fuirídiaoí, ⁸mei íadi afémaci Miguel náiraina anáfenonidiaíoi. Iemona dragón imaci illino monamo iñede. ⁹Afe ie illino iñena jira afe riírede dragón monámona ja jino dotaca. Afe jaiái ninomo ite jaio daínámie jíáifodo mameina Taife, íemo Satanás, íemo dáamie nana náiraina

jífue fire dímie. Afémie naa ie abí imáciri ana éniemo dotácaiaioi.

¹⁰ Afe méifomo monámona ficírede uaina cacádicue. Afe uai daide:

—Cai Juzíñamui bínie comini jílloillena mámiarui mo ja dúcide. Daje izói íemo ite ríino facálliruimo ja dúcide. Iemo daje izói illáimana ie illíruimo ja dúcide. Daje izói ie jító Cristo riire ocuálliruimo ja dúcide. Mei cai ámatiaimo fiénidifue nitáfiredímie ja jino dotácaza. Afémie nágaruillai, mona naio diga cai Juzíñamui uíecori afémacimo fiénidifue nitáfiredie. ¹¹ Cai ámatiai Cordero díedo fiénidifuena anáfenodiaioi. Daje izói íaioi jino meáiruñeno lloga Juzíñamui uáillaído caifófeficaidiaioi, mei jaca tíllana jacíruiñediaioiza; mei jááfodo jaca tílle mo ñue finóbidiaioiza. ¹² Iemona, mona naa afénomo ite cáadinuiairi mai omoi íóbiri. Mei íadi éniemo itino ñi dúerena, naa monáillaimo itínuiairi, mei Taife óomimo ana iere icírillano jáideza. Afémie nano íanori ie íllena onódeza.

¹³ Afe dragón ana éniemo ie dótajana onóillano, nauí íza jocódingo racade. ¹⁴ Mei íadi afe ringo mena áillue máajaiño íaicona iga, áfedo afe jaio daínámie dragómona jica tázicimo afengo féellena. Afénomo daámani fimona átuedo afengo ecáecaiga. ¹⁵ Iemo jaio daínámie áillue jainoi ie fuémona orede, imánina comúllena, mei afe imánido afe ringo coróbaitallena. ¹⁶ Mei íadi énie ringona ríidote, mei afe dáaruído énie bócocaillano, afe dragón fuémona oreca imánina naítateza. ¹⁷⁻¹⁸ Afe bíemona afe dragón ringomo iere ríicaide. Ríicaillano

aféngomona fiévide ie erófene igímaiai diga fuirízaide. Afémaci Juzíñamui ocuica uaillai jeire otíaioi. Daje izói afémaci Jesucristo lloga ua ráfuenta fáicanocaiñeno nágarui jeire ófirediaioi.

13

Mena áillue jacire eroide rille cíocaide

¹ Monáillai fuédamo cue naidáillano monáillaimona iere jacire eroide rille caifo bíllana cíodicue. Afémie ifo siete dígade, daje izói afémie diez diga zícairede. Afe illa diga zícaimo illaíma jítaracuifoí jíina. Afémie ifóciaimo Juzíñamuina fieni daina mámecei cúeina. ² Afe cue ciona jacírede rille jánallarina eroide. Ie ídaiai oso ídaina eroína, íemo ie fue león fuena eroide. Bímiemo dragón íemo ite ríino naa ie illáimaillano diga afémiemo fecade. Afe llezica riire ocuífírenafue afémiemo lloga. ³ Afe jacírede rille ifóciaimona daaci titade áillue boáfena eroide illa. Mei íadi afe titáacade áillue boafe raire jacaide. Iemona nana énie náiraiai áferi iere jacínaitiaioi. Jacínaillano afémiemo ínotiaioi. ⁴ Afémaci dragón uícomo éniemo fueco diné bíjicaillano íemo caimátaidiaioi, mei dragón riire ocuille ríino afe jacírede rillemo ígaza. Iemo daje llezica jacírede rillemo caimátaidiaioi. Caimátaillano daidíaioi:

—¿Bu mei bie jacírede rille izoina? ¿Bu mei afémie diga fuirírena? ¡Afémie anáfenonide! — daidíaioi.

⁵ Afe llezica afe jacírede rille afémie úrilla bu llétañega. Iemona Juzíñamuina íaire daina

uaina lloete, naa fienu abi inuafuiai. Afe izoi cuarenta y dos diga fui, dai ie ocuilla buna rairuinega. ⁶ Iemona afemie bie izoi finode; Juzinamuina uaitano, ie mamecina aire daioide. Daje izoi Juzinamuimo uriranona aire daioide. Iemo monamo itinuiana daje izoi aire daioide. ⁷ Iemo jiai daje izoi Juzinamuimo jainaidino diga ie fuirilla buna rairuinega. Daje izoi afemaci ie anafenolle buna rairuinega. Iemo nague ocuille riino afemiemo fecaca. Daje izoi nana comini jofuai ocuifireite, iemo daje izoi nana jiaifodo uritnuiai ocuifireite, iemo daje izoi nana nairaiiana ocuite. ⁸ Nana biniemo itino afe jacirede rillemo camataidiaoi. Afemaci mameciai zina itino rabenico como cueña. Ua enie taineina llezica baimaci mameciai afenico como cueña, mei afemaci inoñena jira. Afenico naui titaca Cordero ie.

⁹ Bifumemo cacacadimie mai biemo cacarei. ¹⁰ Jiamacina maita uitino meifodo nane maita uille. Iemo jiai lloefaido jiamacina titadino meifodo afemie daje izoi lloefaido titalle. Mei jira Juzinamuimo jainaidino comicina jaridonidiaoi; daje izoi jiai ñue inorediaoi.

¹¹ Afe meifodo jiaie jacire eroide rille eniemona caifo billana cidicue. Afemiemo mena zicai ite; cordero zicaina eroide. Mei iadi afemie dragón urilla izoi urite. ¹² Naui monaillaimona bite nanoide jacire eroide rillemo ite riire ocuille riino, daje izoi bie meifoidimie ite. Iemo nanoide jacirede rille uicori, bime iemo ite riino acatate. Ie riino acata llezica afemie nana eniemo itinuiai, nanoide jacirede rillemo camatallena

ocuide. Afe nanóidimie ifomo ite áillue boafe raire jacáidimie. ¹³ Iemo afe méifoidimie daje izói iere jácimie daiítate raana cíotate. Mei uafue, afémie nana comini eróicana monámona iraicí ana éniemo cocítate. ¹⁴ Iemo afe nanoide jacírede rille uícomo buna ráiruiñega ie finócaigado nana bíniemo itinuiaina jífujete. Afémacina jífuiano afe aillo bofédaite jacírede ríllena eroide jánaraina afémacina finótate. Afe bofédaite jacírede rille lloéfaido aillo bofeca, mei íadi nai caade. ¹⁵ Iemo afe méifoide jacírede ríllemo, afe jánarai cáatalle ríino íemo iga. Iemona afe jánaraina cáatano, afémie afe jánaraina úritade. Daje izói nana afe jánaraimo camátaiñedinona afe jacírede rille jánarai íaioina fatátate. ¹⁶ Nana afe baimo, nana náiraiaina bie izói itátate; nana jabóidimaci naa jamánomoidimiiai diga, nana ráaredino naa dúeredino diga, nana ráiruiñegano naa rairuícano diga, íaioi onoi nabézimo daa onótate número jóonetade. Afe onótate número nabézimo jóoneñenia íaioi ozócimo jóonerede. ¹⁷ Naga afe onótate númerona cúeñegamie jaca íbárinide, daje izói raana fecánide. Afe número nanoide jacírede rille ie. Afe número afémiemo dúide mámecei daiíacade. ¹⁸ Bifue onóillena iere báitajamo dúide. Afena onóidimie, mai afe jacire eroide rille número faca. Afémie número íima ie. Afe número seiscientos sesenta y seis.

14

144,000 dígado roga rua

1 Afe méifomo Cordero Sión mameina idu emódomo naidáinana ciódicue. Afénomo afémie diga ciento cuarenta y cuatro mil comini naidáiede. Afémaci ozócimo Cordero mámecei naa ie Moo mámecei diga cúeina. 2 Iemo monámona ficírede raana cacádícue. Afe ficírena aillo imánillai nofíco tua ficírena izoide. Jiái riire mona gíría ficírena izoide. Iemo jiái aillo arpa daina, rua roia taiga ráaniai ficírena izoide. 3 Afe llezica illaíma ráiirano uícomo afémaci comue rua rotíaioi. Daje izói cuatro diga cáadimíiai, íemo éicomini uícomo rotíaioi. Afe rúana jaca buna ónide. Dani afe ciento cuarenta y cuatro mil diga éniemona jíllode comini afe rúana onona. 4 Afe bimaci ringomo jíriñedino, mei afémaci jaca íaifuenidino; dani íaioi abi rairuídíai. Daje izói afémaci Cordéromo jaináitagamací. Afémaci comínimona jíllotagamaci, Juzíñamuimo nanóidino ie dúidímacína íaioi íllena. Daje izói Cordéromo nanoide dúidino itíaioi. 5 Afémaci jaca táinona úriñediaioi, mei afémaci Juzíñamui illáimana ráiirano uícori íaifuenino itínoza.

Daámani ángeles daínámaci Juzíñamui abi ímíiai llócaiga uai

6 Afe mei jiáie Juzíñamui abi ímie mona dáafenedo féiana ciódicue. Afémiemo zíiñona jíllollíuai illa, bíniemo itínomo llóllena. Nana énie náiraiamo llórede, íemo nana jiáiziemo. Daje izói nana jiáífodo úritínomo llórede, íemo daje izói nana comini jófuiaido. 7 Afémie ficírede uaido daide:

—Juzíñamuina ñue omoi jacíruiri; ñúefuiaina afémiemo omoi nitari, mei afémie iere riire jicánolliruimo ja dúcidez. Mai mona finódimie, daje izói énie finódimie, íemo monáillai finódimie, íemo éniemona jainoi jino torano finódimie; afémiemo omoi caimátaifireiri, —daide.

⁸ Iemo nane jáiie Juzíñamui abi ímie méifodo cíocaide; afémie daide:

—Ja jáicoizite, ja jáicoizite. Afe áillue Babilonia jofue jáicoizite. Mei aillo fiénide jiruífuiái izoide íaifuiái omoi finofirenado, nana nairai jifáidino izói itátatiomoiza, —daide.

⁹ Afe méifodo íraie Juzíñamui abi ímie ficire daíioicaide:

—Dáamie jacírede ríllemo caimátaiai, íemo jái afe jánaraimo caimátaiai, íemo daje izói afe rille mámece ozócimo ninena ónoimo cuetátaiai, ¹⁰ afe izóidino Juzíñamui lloga jamánomo duere finóllinomo orélliaioi. Mei afe izóidinomo afémie iere riicaide; riicaillano afémie duere íaioi finolle, féiñellena riire íaioimo mamécaza. Iemo Juzíñamui abi imaci uícomo, daje izói Cordero uícomo, iraido íaioina iere izi cácatalliaioi. Iemo daje izói nairai iere uzire cónaitalle raado afe izóidinona iere izi cácatalliaioi. ¹¹ Duere íaioi zefuítate irai uíllie jaca ninomo llícañeno caifo uillíoide. Afe jacírede ríllemo caimátaidino mona naio diga afe duere finóinamona jaca ócozinaiñeitiaioi. Afémaci naa afe ríllena eroide jánaraimo caimátaidínori, íemo jái ie mámeceina onótate número otino diga nana jaca ócozinaiñeitiaioi. ¹² Mei jira Juzíñamuimo jainaide ie

ocuica uaimo jíeruitino, naa Jesudo fáicanocaiñede jáidino diga, comécina járidonidiaioi.

¹³ Nane afe méifomo monámona daa uai cuemo úrillana cacádicue; daide:

—Bie cúeiri: “Benómona cai Ocuíraimamo íinote tíitino caimare íitiaioi.” Afena Juzíñamui Ñuera Joreño “Jii” dáideza, mei afémaci íaioi táijinamona ocózinaitiaioiza. Daje izói íaioi finócano, jáima diga nabáirilla izói féitañegaza, —daí daide.

Ria llizilla óina izói, énie comini jofo ollíruimo dúcide, Juzíñamui duere íaioi finóllena

¹⁴ Afe mei eróillano úzerede mona ero uílliena ciódicue. Afe uíllie emódomo Nanoide íima Jitona Jesuna éroidimie ráina. Ie ífomo oro finoina illaíma jítaracuifoí jíina. Daje izói hozna mámecirede arroz izoide llízie ñetara llíide. (Afe raa jofo icuífoina néfide jáirede lloefai izoide.) ¹⁵ Iemo nane jáie Juzíñamui abi ímie ie gairíracomona jino billa. Afémie ficírede uaido uíllie emódomo ráiidimiena daide:

—O llíiga llízie ñetara raado táijiri. Ja jeede diga mai jofo ono. Ja jofo ollíruimo dúcidez. Enie comini finócafuaí ja jeede ríaniaí izói fiénidifuenta iere oruídeza, —daide.

¹⁶ Afe mei uíllie emódomo ráiidimie ie llíiga llízie ñetara raado énie comínimo táijizaide. Afedo fiénidifuenta oruídino jofo ote.

¹⁷ Afe mei jáie Juzíñamui abi ímie monamo ite Juzíñamui gairíracomona jino bite. Daje izói afémie jáirede llízie ñetara raa llícabite. ¹⁸ Afe llezica jáie Juzíñamui abi ímie Juzíñamuimo caimátairanomona

jino bite. Afémiemo jobáitale ríinona ite. Iemo afémié, jáirede ñetara raa llíidimiena ficire jírillano daide:

—Mai omo ite jáirede ñetara raado táijiiri; éniemo ite jírilloillai ollíruimo ja dúcidez. (Afe jírilloillai fiénide comini jana.) Mai jofu ono, mei afe jírilloillai ja iere jiduúdeza, —daide.

¹⁹ Iemo afe jiáie Juzíñamui abi ímie, ie jáirede ñetara raado énie comínimo táijizaide. Afedo éniemo ite jeede jírilloillai izoide fiénidino jofu ote. Uano áillue iduíracu izóidinomo jofu dite, afénomo riire iduúllena. Bie iduilla Juzíñamui bie izói duere afémacina finolle jana. ²⁰ Afe jírilloillai izoide fiénidino áillue comini jofue jinomo iduica. Afe iduíracomona aillo díena tote. Afórede imani izoide; áfeji caballo táia ie fue illa dinori afórede. Daje izói áfeji trescientos kilómetros dinó tote.

15

*Iraie siete dígade jacírede duere fnóllifuii
Juzíñamui abi imaci mameca*

¹ Iemo monámona jiáie jacínaitade áillue raa jánana ciódicue. Siete dígade Juzíñamui abi imaci iráie siete dígade jacírede duere fnóllifuii lluíbitiaíoi. Afedo Juzíñamui ríicaillana záate.

² Daje izói, vídriona finóinana eroide monáillajina ciódicue. Afeji réici díga taméricaide; daí eroide. Jacírede ríllena anáfenodino afe fuédamo naidáiediaíoi; daje izói ie jánaraina anáfenodino; íemo jiái afe ie número mámecina ozócimo cúeñegano díga. Nana dáanomo afe vídriona eroide

monáillai fuédamo naidáiediaioi. Nana bimaci Juzíñamui íaioimo fecaca ‘arpa’ daina rua roia taiga raa llíiediaioi. ³ Afémaci Juzíñamui jaijai ocuífíregamie Moisés rua rotíaioi. Daje izói jíái Cordero rua rotíaioi. Aférua bie izói daide: Ocuíraíma, nana o finócanuiaí iere ebíriede.

Jamánomo ríinorede Juzíñamuidio.

Náiraiái Illaíma, nana o jáifírena io uáfúena jáícina jóide.

⁴ Ocuíraíma, ona ñue jáciruíñeitimíena iñede.

Daje izói omo ñúefúena jóoneñeitimíena iñede.

Mei dama o íaifuenidimíenaza.

Naga náiraiái omo caimátaizaibítiaioi, mei o jáícina finófiregafuiaina ciódiaioiza.

Aquíe izói rotíaioi.

⁵ Bie méifodo, monamo ite Juzíñamui gairíraco túijicaillana ciódicue. Afeco nofíbícimo cuela Juzíñamui ocuica uailaí éenorano. ⁶ Afécomona Juzíñamui siete dígade abí imaci jino bite. Afémaci siete dígade jacírede duere finóllífuaí uite. Afémaci ráífide íáinide queníredicuiruaí jítáoidiaioi. Iaiói llaitáoiga oro finoina ciraijí ife jogóbemo dúcide. ⁷ Ie mei cuatro dígade cáadimíaimona dáamie afe siete dígade Juzíñamui abí imácimona illa dígamíemo oro finoina ichecoí fecade. Aféhecoí jaca nínomo zíñona ite Juzíñamui ocuica duere finóllífúena oruide. ⁸ Iemo afe Juzíñamui gairíraco uíllíena oruide. Afe uíllíe Juzíñamui jamánomoidimíena íllamona, daje izói ie iere ríinorenaimona comuide. Afe llezica afécomo buna jofo jáinide. Nai afe siete dígade Juzíñamui

abi imaci siete dígade jacírede duere finóllifuiyai
záiñena llezica buna jofo afécomo jáinide.

16

Juzíñamui duere finóllifuenta oruide ichécuai

¹ Afe mei Juzíñamui gairíracomona jino bite
ficírede uaina cacádicue. Afe uai siete dígade
Juzíñamui abi imácina daide:

—Juzíñamuimona bite siete dígade duere finuana
oruídichecuai ana éniemo tótaji, —daide.

² Nanoide Juzíñamui abi ímie jaillano, afémiemo
ite ichecoí ana éniemo totade. Afemona nana
jacírede rille mámecina ciegánomo jacírede duico
comuide. Afémacimo izírede jílloñañede ñozagi
izoide duico comuide, daje izóí afe rille jánaraímo
caimátaifiredinomo.

³ Iemo méfoide Juzíñamui abi ímie afémiemo
itíchechoí monáillaimo totade. Tótamona afe mon-
aillai jainoi tídimie die izóí jaide. Iemona nana
monáillaimo ite cáadinuiai tícoizite.

⁴ Iemo nane jáíie Juzíñamui abi ímie afémiemo
itíchechoí imánillaimo, daje izóí éniemona jainoi
jino toránuaímo totade. Iemona afeno jánoillai
díena jaide. ⁵ Afe mei jainoi fienu finótate Juzíñamui
abi ímie dánana cacádicue; daide:

—Ocuíraíma, íaifuenide Juzíñamuidio. Bie izóí
comini duere o finóllena iere comécina jaícina
jóidimedio. ⁶ Mei omo jáináidinona títano íaioi
díena nauí totádiaioiza. Daje izóí o dibénedo
úritino díena totádiaioiza. Iemo birui afe íbana

o afémacina díena jirótatio, mei daíí afémacimo dúideza.

⁷ Afe mei nane Juziñamuimo caimátairanomona dámie dáinana cacádícue; daíde:

—Jíi, uáfueza, cai Ocuíraíma, o jamánomo riírede Juziñamuidio. Uáfueña ñue jaícina iere riire jicánotio, —daíde.

⁸ Ie mei nane jíáie Juziñamui abi ímie afémiemo itíchechoi jítómamo totade. Afemona afe jítoma comíni cóonaitalle riíno iga. ⁹ Iemona nana comíni jamánomo cóonaitaíoi. Mei íadi íaíoi comeci itífuiaína méidoñediaíoi. Daje izói Juziñamuimo caimátaiñediaíoi. Mei jíáifodo afe jacírede duere finóllífuiaí ocuídímiena faidófirediaíoi.

¹⁰ Iemo nane jíáie Juziñamui abi ímie afémiemo itíchechoi jacire eroide rille illáimana ráiiranomo totade. Afe llezica afémie náamataga illano jítirecaide. Iemona nana comíni afe uícodo íaíoi mo comuide duícuaí izírenari dani abi ainízitiaíoi. ¹¹ Mei daíí itíaíoi íadi, íaíoi finoca fiénidífuiaí fáicanocaiñediaíoi. Mei jíáifodo, izi íaíoi cácana ícoínia, daje izói jacire íaíoi ñozánaillamona, monamo ite Juziñamuina íáire daídíaíoi.

¹² Iemo nane jíáie Juziñamui abi ímie afémiemo itíchechoi áillue Eufrates mámeçirede imánimo totade. Afemona afe imani zafénaite, áfedo illaini raire ruica bille io tuiñóllena. Aféllaini naa íaíoi fuirírainiri jítoma caífo biránomona bitíaíoi.

¹³ Afe mei dragón daínámie fuémona, daje izói jacire eroide rille fuémona, daje izói taino uai jino llófiredímie fuémona daámanide cúuraícina eroide fiénide joríaí jino bíllana ciódícue. ¹⁴ Afe

daámanidino Taife jóriai. Afémaci ciórainina raana cíotafiredino. Bie damieámanidino nana énie illaini naa íaioi fuirírainiri dáanomo gairítaite, jamánomo riinorede Juziñamui diga fuiríllena. Aferui Juziñamui aillo iba ollirui.

¹⁵ Aféruido monámona Cristo úrillana cacádicue; daide:

—Ero, cacai. Merírizaibitímie billa izói, comini nai cuemo coméciñediaioimo déizaibitícue. Cue bille llezica iniñeno cuemo comeci facáoidímie caimare íite. Daje izói emuíroma mácañeillena iníroina ñue úiñotímie izói, íaifuemona abina ráiruitímie méairuiñeite, —daide.

¹⁶ Iemo afe daámanide fiénide jóriai, nana illáinina dáanomo gairítate. Afeno mámecei hebreo uaido daína Armagedón.

¹⁷ Iemo siete dígademonas íraie Juziñamui abi ímie afémiemo itíchecei caifo táifomo totade. Tota llezica monamo ite gairíracomona ficírede uai cácaide. Afe uai illaíma ráíiranomona jino bite; daide:

—Ja fuite, —daide.

¹⁸ Afe méifodo, améuai llairilla. Mona gírria naa ficíriede ráaniai diga cácaide. Afe llezica énie iere riire dokaide. Nanómona bíniemo comini ía docáífirena baímo, jamánomo riire dokaide.

¹⁹ Iemona afe áillue comini jofue daámani dieze bójicaide. Jíáie bíniemo ite jofue jáicoizite. Afe llezica Juziñamui áillue Babilonia jófueмо úbicaide, duere íaíoina finóllena. Afe duere finóllifue comini títaite ríjji jírúa izói íite. Afémie rícaillano daí íaíoina fínoite. ²⁰ Afe dáaruido nana monáillaji

cigi íduai naa jíáie caifóneduairi niné táinocaide.
 21 Afe llezica aillo jéerie nocíjiaina monámona
 comínimo cocide. Aféjiaimona dáarie cuarenta
 kilos méere. Iemona afénomo ite comini afe áillue
 nocíjiaí cóciari Juzíñamuina íáire daídíaiói, mei afe
 bimaci duere fínua iere jamánomoideza.

17

Jamánomo jiruédingo duere finóinafue

¹ Afe méifomo siete dígachecoí llíide Juzíñamui
 abí imácimona dáamie cuemo úrizaibite. Cuená
 daíde:

—Eróizaibi. Jamánomo jiruérede izoide
 íaífueredingo duere finóinana omo ácatatícue.
 Afengo monáillajillaimo ite. Afe bie izóí daííacade
 aillo nairai afengo anamo itíaiói. ² Bíníe illaini
 afengo díga aillo fiénide íaífuiái finóírediaíói.
 Iemo bíníe comini afengo íaífuerenamona
 jífaííredino izóí íáire jáidiaíói, —daíde.

³ Afe mei Juzíñamui Ñuera Joreño nicáirilla izóí
 cuemo ácataja llezica, daa Juzíñamui abí ímie
 táizicimo cue uite. Afénomo daa ringo jáirede
 jacire eroide rille emódomo ráiinana ciódícue.
 Afe ríllemo díga Juzíñamui íáire daina uailíai
 cúeina. Afe rille siete díga ífócírede, daje izóí
 afémie zicai diez dígade. ⁴ Afe ringo jítaíogacuiro
 jáirede, íemo morádoná eroide. Afengo oro
 finoina íena ebire finóbide, íemo ráífide ñue finoca
 nofíciaina, íemo ‘perla’ daina zíriona finóbide.
 Iemo afengo oro finoina íchecoí llíide. Aféchécoí
 íáirede raana oruide, íemo jíái afengo jiruírena

llezica finoca íaifuiaina oruide. ⁵ Afengo ozócimo cuetá jónega ónonide mámeçi illa. Afeci bie izói daide: “Aillue Babilonia jofue, nana fiénidifuiái jillaci, aféfuiai ei daina izói mameide. Iemo nana bíniemo ite éoigafuiái ei daina izói mameide.” ⁶ Iemo diga Juzíñamuimo jaináidino afe ringo ícoinia fazícaiaioi. Afémaci Jesús uai llócaina jira afengo titácaiaioi. Iaiói fazícanori afengo, come jifáifirena izói, iere ióbide. Afena cíoillano iere jacire fáigacaidicue. ⁷ Ie jira Juzíñamui abi ímie cuena daide:

—¿Minícari jacínaitio? Afe ringo ónonino daiíacanafue jino omo onótaiticue. Daje izói afengo uífirede jacírede rille maméinafueña omo onótaiticue. Afe rille ifo siete dígade, íemo diez diga zícáirede. ⁸ Afe o ciona jacírede rille jaiái nino íímie, mei íadi ie tílla mei jae íñede. Mei íadi afémie íraicaiño ie tílle uícodo meine abido fiénide joríaí íbáirafomona caifo biite. Mei íadi billano zíñona ie duere finóllinomo orelle. Eniemo ite comínimona zíñona ille rabénicomo énie taineina llezica mámeçina cúeñegano, afe rillena cíoillano iere jacínaificaitiaioi, mei afémie jaiái íteza, íemo biruí jae íñedeza, íemo meine abido uire bíiteza.

⁹ Biruí cai uaina féiruíñedinomo nai benó jíaie llollífuena ite: Cácarei. Afe siete dígade ifóciaí baie ringo ráina siete dígade caifóneduai jana. ¹⁰ Iemo afe llezica afe siete dígade ifoci daje izói siete dígade illaini jana. Afe siete dígade illáinimona cinco diga ja dotácaiaioi. Afe mena fiébidemona daa nai illáimana ite. Iemo jíáimie nai

illáimaizabiñede. Afémacimona íraillaíma bíadi are íñeno táinocaite. ¹¹ Naui caade íocírede rille, tíide íadi, nane birui caade illaíma. Afémie si-ete dígademona afémaci emódoidillaíma. Mei íadi afémie siete dígademona dáamie. Afe mei afémie íraicaiño ie tíillinomo jáite.

¹² Afe o ciona diez dígade zicai, diez dígade nai illáinina jáíñedino jana. Mei íadi jacírede rille diga dáaruido afémaci nano íanori dieze illaíni ocuífirina ríino llínoítiaíoi. ¹³ Bie diez dígade illaíni conímamo daje izói comécíidiaíoi. Iemo íaíoi mo ite ocuille ríino jacírede ríllemo fécaítiaíoi. ¹⁴ Iemona Cordero daina Jesucristo diga fúiritiaíoi; mei íadi Cordero íaíoi na anáfenoite. Mei afémie nana ocuídínomona Jamánomo Ocuídímieza. Daje izói afémie nana illáinimona Jamánomoidillaímaza. Afémie diga jáicadino Juzíñamui nizada jíriganó. Daje izói afémaci fáicanocaiño Juzíñamuimo ñue íinofiredino, —daí afémie cuena daide.

¹⁵ Juzíñamui abí ímie nane dáanomó cuena daide:

—O ciona monáillajillai, ní afe íaífueringo illano, afe monáillajillai aillo jófueniaí jana. Daje izói aillo comíni jana, íemo jíáíforie úritino jana, íemo aillo náiraíai jana. ¹⁶ Jacire eroide ríllemo o ciona zícainiaí jíáie illáimaíai jana. Afémaci bie jiruíredingona éoitiaíoi. Eoillano aféngona zóofeítiaíoi, íemo jíáí aféngona emuírogí óreitíaiíoi. Afe mei aféngo íeizina ríítiaíoi. Iemo jíáí aféngona iraimo cóonaitaítiaíoi. ¹⁷ Juzíñamui comeci jítaina izói afe ringona duere íaíoi finóllena ónonino íaíoi comécimo úrite. Ie jira dájena comécíidiaíoi

íaiοimo ite jacire ocuille ríino jacírede ríllemono fecállena. Iemona afémie jamánomo ríirede. Daií Juzíñamui daina uáillaína fuillíruimo dúcia llezica finófirediaiοi. Iemona afémie daina uaina ñue ícoimo záitatiaiοi. ¹⁸ Afe nauí o ciona jiruíredingo, nana énie jamánomo ocuífiredillaíma illágobe jana, —aquíe izói daide.

18

Babilonia jofue táinoicailla

¹ Bie méifodo monámona jíáie ángel dainámie, Juzíñamui abi ímie ana bíllana ciódicue. Afémie aillo ríino díga bite. Afe llezica ie quenire bóodedo bínie egáiñote. ² Afe llezica afémie ficire úrite; daide:

—Aillue Babilonia jofue ja jáicoizite, ja táinoacide. Taife ocuífiregano illánona jaide. Daje izói nana jíáiforiède íáirede jóriaí uíñoracona jaide. Afe izói nana íáire féedino jilláillinona jaide, naa jíái cai éoiga féedinuaiiri. ³ Mei aillo fiénide íaifuiái afengo finófirenado, nana nairaí jifáidino izói itíaiοiza. Iemo naga énie illaini afengo díga aillo jiruífue izoide íaifuiaina finófirediaiοi. Bíníemo ráaniaí fecáfiredino iere úcuberedinona jáidiaiοi. Mei uafue, afe áillue jofue comini izire jicaca táinomo faitátate ráaniaí íaiοi jicáfirenamoná bímaci aillo úcubenaídiaiοi.

⁴ Afe mei monámona jíáie uaina cacádicue; daide:

—Omoi cúeiediomoiza bie jófuemona oni omoi jai; íaiοi finoca fiénidífue afémaci finua izói omoi fínoñeilleza. Daje izói íaiοimo zúite

jacíredifuiái ómoímo jíiriñelleza. ⁵ Mei afémacimo ite fiénidifuiái ofilla ja monamo dúcidez. Iaiói finoca fiénidifuiáimo Juzíñamui ja uúbicaidez. ⁶ Iemo Juzíñamuina daide:

—Jiáimacimo íaiói feca izói, afe izói íaióimo fecari. Iaiói fiéni fínua izói, afe baímo ménacaiño afémacimo finori. Afémaci ñúemacimo eriredena jóoneta jirota izói duere íaióina finódiaíoi. Afe íaiói fínua izói, afe ibana ménacaiño afémacimo riire duere íaióina finori. ⁷ Aillo táinodo abi íaiói ínua dieze, íemo cómena canóñedemo fáififirena dieze, áfeze afémacina duere finori; afe izói íaióina duere zefuítari. Mei bie ringo izoide jofue comini afengo ie comécido daífiredeza: “Benomo illáingona ráiidicue. Jaca fécinaiñeiticue; jaca dúeniticue,” —afengo daide. ⁸ Ie jira bie izói úrillamona, dáaruído omo dúide jacíredifuiái cómuíte: tíilla íemo duere zefuilla, íemo júbie. Iemo iraimo cóonaitio. Mei o duere finótate Juzíñamui jamánomo ríinoredeza. Afémie jaca cai Ocuíraíma.

⁹ Afengo díga jiruúde bínie illáicomini, daje izói afengo díga cómena canóñedemo fáifidino aféngori iere éenaitiaíoi. Mei uafue, afengo cóonaila uílliena cióillamona aféngori cáillicailli éeitiaíoi. ¹⁰ Afengo iere duere finóinari jacínaillamona oni jica íitiaíoi. Afemona dáititiaíoi:

—¡Aíi, níi o dúerena! Jamánomo ríirede Babilonia jófuedio, jníi duere o zefuilla! ¡Mei raire dáaruído o duere finoina comuúbicaide! —dáititiaíoi.

¹¹ Bínie ráaniai fecáfiredino aféngori cáillicailli éenaitiaíoi, mei ja íaiói atica ráaie íbaitino íñede.

¹² Iaiói atífirega ráaniai, be níie: Oro, plata, ráífide

nofíciái, ‘perla’ daina ráifide zírío, ráifide úzecuiro, íemo jáirede ‘sédacuiro,’ morádona eroide seda diga, íemo jáí digá jáífodo zióriede aménaíai, íemo ebírede ‘marfil’ daina elefante zicaí finoina ráifide raana, íemo ráifide amena finoina raa, íemo ‘bronce’ daina borárede lloébici finoina raa, íemo jamai lloébici finoina raa, íemo ‘marmol’ daina nofici finoina raa, ¹³ dajé izói ‘canela’ daina güüllemo faíga raa, íemo jáíforie ráifide ziórede raa, íemo ziórede uguci, íemo ‘mira’ daina ziórede raa, íemo come abí jilláiraniai, íemo ‘vino’ daina jiróraji, íemo cáiredíji, íemo ñuera pan finófirena harina, íemo trigo, íemo dajé izói abífirede cáadino, íemo ovéjaíai, íemo cabálluai, íemo ‘carros’ daina arínellaíai, dajé izói jacire rairuica comínina fecádiaíoi. Bie izói daina cáadino iima ringo diga jáíimacimo fecádiaíoi riire íaíoi ocuüllena. ¹⁴ Afe jofue comínina dáitiaíoi:

—¡Baie omoi gaíga caimárede amena llizíllaniai izoide ráaie jae ññede. Nana omoi ofítaga ebíriede ráaniai ja táinocaide! —dáitiaíoi.

¹⁵ Afe ráaniai fécajano iba úcube ófiredino bie áillue jofue comínimona otíaíoi. Uano aillo úcuberediaíoi. Mei íadi aféruido afe jofue iere duere finóinari jacínaillamona oni jica íitiaíoi. Afénomona aféngori cáillicailli éeitiaíoi. ¹⁶ Íemo dáitiaíoi:

—¡Aíi. Aillue jófuedio níi dúerena! Naui ñuera ráifide úzecuiro jítádingo izóidio. Dajé izói o comíni jáirede ráifide iníroi, íemo morádona eroide ráifide iníroi jítáfirediaíoi. Afe llezica oro íena finóritiaíoi; dajé izói ráifide nofici finoina raana finóritiaíoi,

íemo jiái ‘perla’ daina zíriona jitáfirediaioi. ¹⁷ Iemo dáaruído naado aillo ráaniai niné táinocaide.

Daje izói nana ‘barco’ daina áillue nocáe ocuídillaini, naa afécaedo jáidino diga, áfena jacíruillano oni jícarié itíaioi; daje izói afécaedo táijidinori naa jiáifodo monáillajimo táijide comíniri oni jícarié itíaioi. ¹⁸ Iemo afe jofue bóua úilliana cióillano caillídiaioi:

—Bie izoide naui áillue jófueña, ¿Ninomo cíoiticaí? Bie izoide jofue jaca íñeite, —daídíaioi.

¹⁹ Iere zúucaillano íaioi ifomo énie júdaidiaioi. Daíí ñiano cáillicailli éediaioi. Daídíaioi:

—¡Aii! ¡Aillue jofue nii dúerena! Nana monáillajido ráaniai fecáfiredino afe ráaniai o comini úamona afémaci aillo úcuberediaioi. ¡Mei íadi dáaruído afe áillue comini jofue ja niné táinocailla! —daídíaioi.

²⁰ Afe mei áfena ciódimie daide:

—Monamo itínuaí, mai afe áillue jofue táinocaillari omoi íóbiri. Uáfueza, Jesucristo orécano, naa Juzíñamui dibénedo úritinori mai íóbiri, naa Juzíñamuimo jaináidino diga. Mei Juzíñamui afengo niné táinocaitajado, omoi duere zefuítaja ñue jaícina iba ote, —daide.

²¹ Afe mei riírede Juzíñamui abi ímie áillue nofici caifo raiñode. Afeci áillue ‘molina’ daina trigo llaira mérede nofici finoina eroide. Caifo ráiñuano afécina monáillajimo dotade. Dótajano daide:

—Afe bie izói áillue Babilonia jofue ana cáicoizite, íemona jaca ninomo meine cíõeille.

²² Benómoma jaca o cígido joide iomo ‘arpa’ daina rua roia taiga raa rúaniaina meine cácaiñeille. Daje izói totíbacui uai naa bainada uai diga ja

meine cácañeille. Afe izói nana jíáiforie táijiana baitádinomona buna fiébiñena. Iemo daje izói dobérilla ficirena izói ‘molina’ daina nofici uaina cácañeille. ²³ Afe daje llezica o jófuiái eromo bóofirede mechera izói boode ráaniai abido bóoñeite. Iemo aféruimo áirena llezica iráizie caimare ficirerie íaioi úrilla uáillaina meine jaca cácañeille. Mei naui omo ite ráaniai fecáfiredino bínie comínimona jamánomoidiaioi íadi, ja birui afe caimárede uailai cácañeille. Naui aféruimo aimabífuefirena uai izóidedo náiraiana jífuefiredio; mei íadi afe jífuefirena ona nabáiñede.

²⁴ Mei uafue, afe o jofue cígimo Juziñamui dibénedo úrifiredino díena ciona. Daje izói Juziñamuimo jaináidino naa jíáie bíniemo fagano díena afénomo ciona. Afe ciona die, afe jofue comini jíáimaci títaja ícoinia daí illa jana, —daide.

19

¹ Afe bie méifomo monamo ite aillo comini ficirede uáillaina cacádicue. Daídíaioi:
¡Aleluya! Cai jíllonano cai Juziñamuimo dúide.

Daje izói iere ebíredifue afémiemo mamérede, íemo naa ñuera ríino diga.

² Mei afémie ñue jaícina ua uaido iere riire jicánofiredeza.

Afe iere jiruíredingona afémie riire duere finótateza.

Afengo iere ie jiruírenado énie comínina íaire finode.

Juziñamuimo táijitagano tilla iba aféngomo oga, daídíaioi.

³ Nane dánomo daídíaioi:

—¡Aleluya! mei afengo jobailla uíllie jaca n̄nomo líicaiñeno uillíoite, —daídíaioi.

⁴ Afe llezica veinticuatro dígade éicomini, íemo jíái cuatro diga cáadimíai diga, ana éniemo bíjicaillano, Juzíñamuimo caimátaidíaioi. Illaíma ráiiranomo ráiide Juzíñamuimo caimátaillano daídíaioi:

—¡Daíítadeza! ¡Aleluya! —daídíaioi.

⁵ Nane afe mei illaíma ráiiranomona jíáie uaina cacádícue; aféuai daide:

—Cai Juzíñamuimo nana afémié ocuícano afémiemo ñúefuíai omoi mameri. Daje izói íena caimare jacíruitino, illáicomini naa jíba comíniri, ñúefuíai afémiemo jóonefireiri.

Cordero dáina Cristo áirena rafue

⁶ Nane daje izói aillo comini uailíai izóidena cacádícue. Afe uailíai aillo imánillai ficírena izói ficírede, íemo jíái afe uailíai ficire mona gíría ficírena izói ficírede. Afe uailíai daide:

¡Aleluya! Jamánomo rírede cai ocuide Juzíñamui nane meine como ócuíte.

⁷ Mai cai ióbilli; daje izói iere caimare cai illi.

Afémiemo ebíredífue cai mamelli.

Mei Cordero áirena izóidíruimo ja dúcidez.

Afémie ai izóidinona jáitino ja ñue finóbidíaioi.

Afémaci Crístomo ua ínotimaci.

⁸ Ráífide úzecuirona jíátaredíaioi.

Mei uafue, íáinino queníredíroi Juzíñamui afémacina jíátataga.

Mei afe ñuera ráífide úzecuiro Juzíñamuimo jáináidino comécina jáícina jóoina jánaza.

⁹ Íemo Juzíñamui abi ímie cuena daide:

—Mai cúeiri: Cordero áirena ráfuego uáidogano ja caimare itíai, —daide.

Nane cuena daide:

—Bíuai Juzíñamui lloga ua uai, —daide.

¹⁰ Iemona afe Juzíñamui abi ímiemo cue caimátailena ie anamo dújudicue. Mei íadi afémie cuena daide:

—Cuemo daí íñeno, mei o izói cue Juzíñamui ocuícamedicueza. Jíi, Jesús llócaiga ua uaimo féitañeno ínote o ámatiai izóidicue. ¡Cuemo caimátaiñeno; Juzíñamuimo cáimatai! —daide.

Mei afe Jesús llócaiga ua uai, Juzíñamui dibénedo lloga uaillai jino llotino comeci úritade.

Uzerede cabállomo ráicaidimie

¹¹ Nane afe méifomo mona tuíñuana cíodicue. Afénomo úzerede caballo cíocai. Afe emódomo ráicaidimie mámecei “Fiel” íemo jíai “Verdadero” daínámie. Mei afémie ñue jaícina illáfuedo ocuúdeza; daje izói áfede fiénidino diga fuirítateza. ¹² Ie ui irai bóua izói quere cíoide. Ie ífócimo diga illaíma jítaracuífoi jítaoide. Daje izói afénomo dama ie onoíga mámecei cúeina. ¹³ Afémie jítacacuiro díemo mutácaroi. Afémie mámecei Juzíñamui Uai. ¹⁴ Afe llezica nana monamo ite Juzíñamui ocuica fuirídino afémie óodana jáidiai. Afémacei ráifide úzecuiro jítaoidiaí. Aferoi jaca íáinide. Baie nana afémiedo jáidino úzerede cabállomo ráicaidiaí.

¹⁵ Afémacei ífódimie fuémona jáirede lloefai jino bite, áfede nana nairai boféllena. Afe llezica afémie lloébicí izóidedo náiraiina ócuite. Vino finócanomo úvaíai iduállena riire záizia izói, afe izói afémie afémacimo iere riire jícanoite. Iemo

jamánomo ríinorede Juzíñamui ríicaillamona cómuite iere duere finóillifue, vino jirótaja izói afémacina duere finótaiteza. ¹⁶ Ie inícuero emódomo jítacacuiromo cuega mámece illa. Daje izói ie riáizimo cuega. Afeci daide: “Nana illáinimona Jamánomoidillaíma,” íemo jíái “Nana Ocuídinomona Jamánomo Ocuídímie.” Afémie níi cai Ocuíraíma Cristo.

¹⁷ Afe mei Juzíñamui abi ímie jítoma riire egáiñuanomo naidáinana ciódicue. Afémie nana mona erodo féedinuiaí ficire jírrite; daide:

—Juzíñamui finoca áillue güille nana dáanomo omoi riáibi, ¹⁸ mei benomo illáini íeizi ríitiomoíza, naa fuiríraini illáicomini íeizi diga. Dáanomo íocirede fuirífredino íeizi ríitiomoi, naa caballo íeizi diga. Daje izói afe emódodo ráiicaidino íeizi ríitiomoi. Iemo nana fiébidino íeizi ríitiomoi. Buna ráiruiñegano, daje izói jacire rairuícano, íemo jíái jamáimaci íeizi, naa jamánomoidimaci diga daje izói ríitiomoíza, —daide.

¹⁹ Afe mei afe jacire eroide ríllena ciódicue naa bínie illáicomini naa íaíoi fuirírainiaí diga. Nana bimaci fuiríllena dáanomo ofídíaioi. Afémaci afe úzerede cabállomo ráiicaidímie diga fuirízaíbitiaíoi. Afémie “Juzíñamui Uai” daínámie. Daje izói afémie canode fuiríraini diga fuiríllena maméritiaíoi. ²⁰ Afe mei afe jacírede rille, taino uai jino llócaidímie diga ja llaveca. Afe taino uai jino llotímie, jacírede rille eróicana, jacínaitade ciórainina raa ciótate. Aféfuiaído afe taino uai jino llotímie, nana afe jacírede rille mámeceina cuetátaganona

jífuate. Daje izói afe jacírede rille jánaraimo caimátaidinona afémie jífuate. Iemona ‘monstruo’ daina jacire eroide rille, daje izói taino uai jino llotímie, cáanori dáanomo duere finolle jorai izoide bóodiimo dotácaiaillinoi. Afe jorai izoide duere finóllino iere uzire boode. ²¹ Nana áfemona fiébidino úzerede cabállomo ráicaidímie fuémona bite lloéfaido titácaiaioi. Iemona nana féedinuai bie titácano riáibillano íaioi íeiziri jeirediaioi.

20

Mil diga fimona dino comini caimare lítiaioi

¹ Bifue méifomo ángel dainámie Juzíñamui abi ímie monámona ana billana ciódicue. Afémie afe fiénide jóriai íbáirafo zuitara llave naa áillue llójeo diga llícabite. ² Afe bie Juzíñamui abi ímie ‘dragón’ daina jáiaira áillue jaio lláitano anáfenode. Afe jaio jáífodo mameina Taife, dáamie Satanás. Anáfenuano afémiena mil diga fimona llaveca. ³ Ana fiénide jóriai íbáirafomo óriano íena llavede. Lláviano afe nazemo ‘sello’ daina “buna zuitánide” daide raa jónete. Daií finoca náiraiaina mil diga fimona dinori jífueñeillena. Afe mil diga fimona jaille méifomo, afémie nano íanori zuitalle.

⁴ Afe mei illaini ráiranuaina ciódicue. Afénomo ráiedino iere riire jicánolle riinona igáiaioi. Afe dáaruido ífóciaina jáicoicano coméciaina ciódicue. Afémaci Jesús jaícina lloga Juzíñamui uai íaioi llócailla ícoinia ífócina jaitácaiaioi. Afémaci afe jacire eroide rillemo caimátañediaioi; daje izói afe jánaraimo caimátañediaioi. Daje izói afémaci ozócimo ie mámecei cuetátañediaioi, íemo daje izói

íaioi ónoimo. Afémaci abi meine abido cáaillano mil fimona dino Cristo diga illáimaitiaioi. ⁵ Afe bie meine abido cáadino, nanóidino meine cáailliruimo abido cáaitiaioi, jae cai daina Cristo diga illáimaillena. (Mei íadi jíáie tíidino mil diga fimona záíñena dino meine abido cáaiñeitiaioi.) ⁶ Nana afe nanoide cáailliruimo meine abido cáaitino caimare itiaioi. Daje izói afémaci Juzíñamui ñue finócano. Afe meífoide tulle afémacimo jaca jíriñeite. Mei íadi afémaci comínido Juzíñamuimo úrifreitínona íitiaioi; daje izói Cristo íeiena zííñona íitiaioi. Iemona mil fimona dino afe Cristo diga illáimaitiaioi.

⁷ Afe mil diga fimona záilla méifomo, Taife ie llavéinafomona zuitalle. ⁸ Jáillano nana énie náiraiaina jífueite. Aféruido “Gogna” mámecirede náiraina jífuiate, “Magog” daina náiraina diga. Afe náiraiái fúiritinuiaina Taife dáanomo jofo óite, íiraicaiño fuiríllena. Afémaci monáillajimo ite guamai dígadeza facádonidiaioi. ⁹ Afemona énie nániena afémaci iere oruíbicaite. Iemona Juzíñamuimo jaináidino illánona nágafene fállena cirínotiaioi. Afe illano Juzíñamui izíruiga Jerusalén daina jofue; áfena cirínotiaioi. Mei íadi Juzíñamui monámona irai afémacimo orede. Afe iraido fiébiñeno cóonaitiaioi. ¹⁰ Afe llezica afémaci jífueoicaide Taife boode jóraimo dotaca. Afe jorai iere uzire boode. Afe dáanomo jacire eroide rille, íemo jíái taino uai jino llócaidímie nauí dotaca. Afénomo mona naio diga jaca ninomo zííñona iere duere finócaiaioi.

Aillue úzerede ráirano illaíma ie, íemo afe uícomo

iere riire jicánollino cioina

¹¹ Afe méifodo áillue úzere de ráirano illaima íena ciódicue. Iemo afénomo ráiidimiena ciódicue. Afémie uícomona nana énie mona diga niné cióbicaíñena. Afe mona énie diga illino jae iñede; jae niné táinocaidiaioi. ¹² Daje llezica Juzíñamui uícomo naui Juzíñamuimo íñoñoeno tíidino naidáienana ciódicue. Afeno jamánomoidinori naa jamáimaciri dáanomo naidáiediaioi. Afe llezica comini finócafuiái cuiánicuai túide. Daje izói afénomo jíáie zíñona ítino mámecei cuiánico túide. Bie tíidino íaioi finócafuiái íllaze riire jicánogaiaioi, mei afe íaioi finócafuiái cuiánicomo cúeina dieze riire jicánogaiaioi. ¹³ Afe llezica monáillajimo báide tíidino meine abido Juzíñamui uícomo caifo náidacaitagaiaioi. Daje izói nana jíáiforie tíidinuai íaioi tíillanomona meine abido Juzíñamui uícomo caifo náidacaitagaiaioi. Afe nana náidacaitagano íaioi finócafuiái íllaze afémacimo riire jicánogaiaioi. ¹⁴ Afe mei ‘muerte’ daina comini tíillafue boode jóraimo dotaca, ie mei niné táinocaide. Daje izói dáanomo naui tíidino íbáinaco afénomo dotaca. Dotaca mei niné táinocaide. Afe bie boode jorai, íiraie tíillana mameide. ¹⁵ Iemo afe zíñona ítino mámecei cuiánicomo mámeceina cúeñegano afe boode jóraimo dotácaiaioi.

21

Comue mona comue énie diga

¹ Afe méifodo comue mona, comue énie diga ciódicue. Mei nanoide mona nanoide énie diga ja niné cióbicaíñenaza. Daje llezica monaillai

jae iñede. ² Afe llezica comue Jerusalén daína íaifuenide jofue, Juzíñamui uícomona monámona ana bíllana ciódicue. Afena ciódimiedicue, Júaadícue. Afe jofue, óllena jicánoga ringo ebire finóbina izói ebire cíoide. ³ Iemo monámona ficire dáinana cacádicue. Afe uai daide:

—Ero, comini cigiri birui Juzíñamui illa. Afémaci diga ífireite, íemo afémaci afémie comínina íitiaioi. Ja birui dama afémie afémaci cigiri íite, afémaci Juzíñamuina ie íllena. ⁴ Juzíñamui afémaci ui jémene zafénaitaite. Aféruimo tílle íñeite. Daje izói eia íñeite, íemo jíái duere zefuíllamona eia íñeite. Daje izói comini abí izírena íñeite, mei jaiai itífuiaí jae záaideza.

⁵ Iemo illaíma ráíiranomo ráíidímie cuena daide:

—Ero. Nana cómuena méidotícue. Iemo nane daide:

—Bie uai íere ua uaiza, mai cúeiri. Daje izói bie uai íere ínofiregaza, —daide.

⁶ Nane afe mei cuena daide:

—Ja ñue ícoímo finócaza. Cue bie naga ráfuiaína nai cómuiñenia uícodo itímiedicue. Daje izói dáamiedicue fuillínomo itímiedicue. Abecedario A-mona táinia izóidímiedicue. Daje izói abecedario Z-mo fuizajilla izóidímiedicue. Jáinoína jiróacadímie ñúejina jirótaja izói, afe izói ñúefuiaí dibénemo íacadímie mo raiñoñoeno afémie mo zíñona illáfuenta ífireitícue. ⁷ Fíénidena anáfenodímie nana bíena feci raa fia máíñua izói, máíñoite. Afe llezica afémie Juzíñamuitícue, íemo daje llezica afémie cue jítóite.

8 Mei íadi nana ínoñedino dibéfodo duere zefuille afémacimo dúide. Uáfueza, ñúfueña jacíruitino daje izói ínoñedino, íemo jíáimana éoidino, íemo jíáimana titádino, íemo jíái jiruífueña finófiredino, íemo jíáima fue gáiana fibídino, íemo jíái jánaraimo caimátaidino, íemo nana táinona úritino; nana bie izóidino boode jóraimo dotárediaíoi. Afe jorai iere uzire boode. Afe bie boode jorai íiraie tíllana mameide, mei afénomo dotácano jaca ninomo Juzíñamuimona oni eneno duere finócanona íitiaíoíza.

Comue Jerusalén

9 Afe mei siete dígade ángeles dainámaci Juzíñamui abi imácimona daa cuemo úrizaíbite. Afémie nauí Juzíñamui ocuica siete dígade íiraie jacírede duere finuana oruide ichecoí uitímie. Afémie cuena daide:

—Ero, Cordero ai izóidena jáitinona o ácataitícue,
—daide.

10 Iemo Juzíñamui Ñuera Joreño bie izóidena nicaí anado cuena cíotate. Afe Juzíñamui abi ímie áillue caifónedumo cue uite. Afénomo monámona Juzíñamui uícomona ana bite jamánomo ñuera Jerusalén jofue cuemo ácatate. 11 Juzíñamui abi ebire quenírena izói afe jofue quenírie cíoide. Daje izói iere ráifide nofici quenírena izói queníriede. ‘Jaspe’ daina nofici vidrio enéfecomo cíoina izói cíoide. 12 Afe jofue jinófenedo nágafene áillue cirínubairo raa ite. Afe cirínogamo doce dígaze naze ite. Iemo illa díga nazemo Juzíñamui abi ímie naidaina. Iemo afe náziaimo

doce dígade Israel nairai mámeciai cúeina. ¹³ Afe jofue náziaimona, fuirífenemo dazeámani ite. Iemo jiáie dazeámani onífenemo ite; íemo jiáie dazeámani féífenemo ite; íemo jiáie dazeámani afáífenemo ite. ¹⁴ Afe jofue jinófene cirínua anamo nofici finoína mozóidibani doce dígade. Illa dígabanimo Cordero nágagobiaimo orécano ‘apóstoles’ dainámaci mámeciai cúeina.

¹⁵ Afe cue diga úrite Juzíñamui abi ímie, oro finoína facáradozi llíide, afe jofue facállena. Daje izói ie náziai facállena, íemo jiái afe jinófene cirínua facállena. ¹⁶ Afe jofue fueda nagaámariede; nágafene daje dinóriede. Ie árrera dibene daje dinóriede; íemo ie ruica dibene daje dinóriede. Afe Juzíñamui abi ímie ie llíiga radózido jofue facade. Facádemo dos mil doscientos kilómetros árrera. Daje izói ruica diné eróicana dos mil doscientos kilómetros. Iemo caífo diné eróicana jiái daje izói dos mil doscientos kilómetros. Nágafenai daje dinóriede. ¹⁷ Afe mei jinófene cirínuabani facade. Facádemo sesenta y cuatro metros caífo ite. Afena Juzíñamui abi ímie come facáfírena izói facade.

¹⁸ Afe jinófene cirínuabani ‘jaspe’ daina nofici finoína. Afe jofue íáinide oro niina. Ñue enéfecomo cíoide vídriona eroide. ¹⁹ Jinófene cirínua anamo mozóidibanillai nana jiáíforiede ráífide noficiado ebire ñue finoca. Nanóidibani ‘jaspe’ daina noficiado ebire ñue finoca, íemo jiáibani ‘zafiro’ daina noficiado ebire ñue finoca, íemo jiáibani ‘ágata’ daina noficiado ebire ñue

finoca, íemo jiáibani ‘esmeralda’ daina nofícido ebire ñue finoca, ²⁰ íemo jiáibani ‘ónice’ daina nofícido ebire ñue finoca, íemo jiáibani ‘cornalina’ daina nofícido ebire ñue finoca, íemo jiáibani ‘crisólito’ daina nofícido ebire ñue finoca, íemo jiáibani ‘berilo’ daina nofícido ebire ñue finoca, íemo jiáibani ‘topacio’ daina nofícido ebire ñue finoca, íemo jiáibani ‘crisoprasa’ daina nofícido ebire ñue finoca, íemo jiáibani ‘jacinto’ daina nofícido ebire ñue finoca, íemo jiáibani ‘amatista’ daina nofícido ebire ñue finoca. ²¹ Afe doce dígade naze ibáirabici áillue perla. Illa dígaze daa perla ie finoína. Afe jofue cígido joide áillue macárao íáinide oro finoína. Afe macárao enéfeomo ñue cioide vídriona eroide.

²² Afe jofue eromo Juzíñamuimo gairíraco jaca ninó daa cíofnedicue; mei jamánomo rínorede Juzíñamuimo ebena nágafeniamo caimátaidiaioiza. Afémiena jiáifodo daina cai Ocuíraíma. (Afe jofue gairíraco Juzíñamui abíza. Daje izói jiái Cordero abíza.) ²³ Afe jofue jitómado egáíñuamo dúíñede; daje izói fiuido egáíñonide. Mei afe jofue Juzíñamui abímo ite ebírede quenírededo egáíñogaza. Daje izói jiái Juzíñamui Cordero afe jofue egáíñogaza. ²⁴ Nana jíllotaga nairai afe jofue egáíñuado mácaítiaioi. Bínie nairai illaini afe jófuego íaioímo ite aillo ebíriede illaíma daíllena ráaniaína átíítiaioi. Atiano Juzíñamuimo, íemo jiái Crístomo izájítiaioi. Daje llezica afe jofue ocuídímie íaillinoímo aillo ñúefuena mámeítiaioi. ²⁵ Afe jofue naze jaca monari íbaiñelle. Iemo

afénomo jaca mona náuiñeite. Jira náziai íbáillirui íñeite. ²⁶ Enie náiraiaí íaioimo ite ebíriede ráaniaina afénomo átiitiaioi. Daje izói afénomo aillo ñúefuiaí mámeitiaioi. ²⁷ Mei íadi comécina íáiredino jaca afénomo jofo jáinide. Daje izói comécina éoidino dinomo jofo jáinide, naa taino llotínori. Dama ziiñona íitino mámeçi cueránicomo mámeçina cuezámaci dani afénomo jofo jaille. Afénico Cordero daina Jesucrístomo ite.

22

¹ Afe mei Juziñamui abi ímie íáinide imánina cue ácatate. Afémami jáinoi cómena ziiñona cáatate. Afeji vidrio enéfenemo uáfori çoína izói çoide. Afe imani Juziñamui illáimana ráiranomona tote. Afe ráirano daje izói Cordero ie. ² Afe jofue çigido áillue macárao illa. Afe macárao dáafenedo comínina ziiñona cáatate aménaiaí riina. Daje izói afénomo ite imani fuédado nágafene daje ie aménaiaí riina. Afe aménaiaí illa diga fiui llizífirede. Iemo jái afe aménaiaí íbiaí nairaí ñue manóllena ite. ³ Aféruillaido afénomo faidórafuena jae íñeite. Juziñamui illáimana ráirano afe jófuemo ite; daje izói Cordero ráirano afénomo ite. Ie ocuífiregano daa afémiemo caimátaitiaioi. ⁴ Afe llezica afémaci Juziñamuimo, meáiruñeno jofo conímamo éroitiaioi. Afémaci ozócimo afémie mámeçi cuezina. ⁵ Afénomo mona jaca náuiñeite. Afénomo itino mechera izoide egáiñuana jítaiñeitiaioi. Daje izói jítoma egáiñuana jítaiñeitiaioi, mei cai Ocuide Juziñamui íaioína egáioite. Iemo afémaci jaca ninomo ziiñona illáimaitiaioi.

Jesucristo billirui ja ánozide

⁶ Afe méifomo Juzíñamui abi ímie nane cuena daide:

—Bie uai iere ua uaiza. Daje izói bie uai iere ínofiregaza. Afe cai Ocuíraima nauí Juzíñamui uai jino llóraini comécimo úritimie. Afémie birui ie abi ímie orede, ie ocuícamacimo raire cómuitifuiaina onótallena, —daide.

⁷ Iemo Jesucristo daide:

—¡Raire biticue! Binícomo cuega Juzíñamui uáillaina jíeruitimie caimare ite, —daide.

⁸ Cue Juáadicue. Bífuiaina cacádicue, daje izói bífuiaina ciódicue. Bífuiaina cacáillano, íemo daje izói cue ciona méifomo, cuemo ácatate Juzíñamui abi ímie anamo dújudicue afémiemo caimátaillena.

⁹ Mei íadi afémie cuena daide:

—Jadíe izói cuemo íñeno. O izói Juzíñamui ocuícamiedicue. Daje izói Juzíñamui dibénedo úrifirede o ámatiai izóidicue. Iemo jíái binícomo cuega uáillaina náfuetino izóidicue. Cuemo caimátaiñeno; dama Juzíñamuimo caimátai fireiri, —daide.

¹⁰ Nane dáanomo cuena daide:

—Binícomo cuega Juzíñamui uaina báinino o comécimo jóoneño o iri. Mei bífuiái ícoimo ñue fuizájillirui ja ánozideza. ¹¹ Nai bie fuiñena llezica, fiénidimaci íaioi finófirega fiénidifuenta dama íaioi finócaza. Fia eroi, mei afe izói íaioi íllado jamánomo duere finólliaioiza. Daje izói comécina íáiredino dama comécina íáireoicaideza. Fia eroi, mei áfedo duere finólliaioiza. Mei íadi ñue itino íaioi illa baimo ñue iri. Daje izói Juzíñamui íena ñue finócamie fáicanocaiño afémie íena í fireiri, —daide.

12 Iemo Jesucristo daide:

—Jii, raire biticue. Illa dígamíemo cue fecalle fia jirídoga izoide raa atídícue. Illa dígamíemo afémíe finoca díeze fécaítícue. 13 Nanóidímíedicue. Iemo jiái íraímíedicue. Daje izói naga ráfuiái uícodo itímíedicue. Daje izói fuizájillanomo itímíedicue. Iemo jiái abecedario A-mona táinia izóidímíedicue. Daje izói abecedario Z-mo fuizájilla izóidímíedicue.

14 Iaiói iníroina jocófiredino izói, comeci ifue ñuérana méidotino caimare itíaiói. Íemona cáatate amena llizállana gürediaói. Afe bie izói daiíacade zíñona íaiói íllena. Daje izói íaiói iniroi ñue jócuamona, afe jofue nazedo Juzíñamui illánomo jofo jáirediaói. 15 Mei íadi comécina íáiredino afénomo jofo jáinidiaói. Iemo daje izói jiáima fue gáiana fibídino, íemo daje izói nana jiáíforiede jiruifue finódino, daje izói cómena méinetino, daje izói jánaraimo caimátaidino, daje izói jiáie comínina iere jífuefiredino, naa afe izoide fibídínori; nana bie izoide comíni afe jófuemo jofo jáinidiaói; jáíñeno jino fiébitiaói.

16 Cue Jesúsídicue. Juzíñamuimo ua jaináidínomo nana bífuiái jino llóllena cue abí ímie ja cue oreca. Jaiái illaíma David comuilla moi ímíedicue; daje izói afémíemona jebuídino comuítagamíedicue. Iemo iere egáíñote monáiracudu izóidímíedicue, —daide.

17 Iemona Juzíñamui Ñuera Joreño daide:

—Mai bi, —daide.

Daje izói Cordero aí daína afémíemo ua jaináidíno íena daide:

—Mai bi, —daide.

Daje izói bíuailaina cacáđino afémiena:

—Mai bi, —omoi daiíri.

Iemo Cristo daide:

—Jiróacaitimie zíñona cáataite jáinoina íbáñeno mai fia júruabiri. Afe bie izói daiíacade zíñona illáfuenta óiacadimie mai cuemo bi; raiñoñeno omo fécaíticueza.

¹⁸ Nana binícomo cuega Juzíñamui uaimo cacáreidinona bie izói llétaiticueza, cacai: Dáamie bie ráfuenta baimo zotáadi, Juzíñamui binícomo cuega jacírede duere fínuaniaina afémiemo jóoneite. ¹⁹ Daje izói binícomo cuega Juzíñamui uáimona dáamie daa uai oni óiadi, Juzíñamui afe zíñona cáaitino mámecei cuiánicomo cuega afémie mámeceina oni óite. Daje izói binícomo lloga nífuenide jófuego Juzíñamui afémiena jofo jáitañeite. ²⁰ Bifue jino llotímie nane dáanomo llote:

—Jii, raíre biticue, —daide.

Afemona Juan daide:

—Aquíe izóideza. ¡Cai Ocuíraima Jesús, mai bi!

²¹ Cai Ocuíraima Jesucristo nana ómoína ñue fínoiteza. Daiítadeza. Jae ñie.

Juziñamui Ñuera Uai
New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
740f11a2-2e26-57f5-a3a7-5deb2d20bd24